

蓮舟遺稿詩

11
3
475

0 1 2 3 4 5 6 7 8 9 30 1 2 3 4 5

始



緒言

叔父蓮舟先生。善詩文。而家不存稿。朔郎患其散逸。請豐島君齋輯之。今年九月十六日。值先生七回忌辰。乃就齋齋所輯。選得詩二百八十六首。文四十六篇。上梓頒於親戚故舊。卷首錄先生筆迹。卷尾附載墓誌。俾後世讀是書者。併考其出處大略焉。

大正十年七月

從子田邊朔郎謹識

大正
10 8. 1
内交

詩

正

誤

五

人間

人間

五十二

君許

人訐

文

三

措詞

邊詞

二十二

皆佳

皆住

二十四

無何樹立之下脫者字

二十八

揚挖

揚托

琴書十載我回移
洗貧幸地立錐
處何寧甘
無更尾入時未
好黛描眉
任君在上
笑悵拙賴
曹情并
癡新構
茅軒
後一
味不
教伯道
嘆無兒

朝郎賢任為予
望二字為諺者
丹賦志表

廿五年



蓮舟遺稿

寓尾日。有人以畫索題者。漫書數首。錄一。嘉永癸丑先生二十三
伊人不可見。遺墨有神情。四竹原公論。千秋不朽名。寒光牀上看。
冷氣壁頭生。傾耳自還怪。如聞夏玉聲。

日野安政乙卯峽府視學先生二十五

層層橫嶺白雲遮。日野津頭夕照斜。痴想今朝送吾者。此時各自已歸家。

小佛

踏遍連山翠幾堆。登登坂路往還回。望雲敢傲梁公感。也有思鄉淚暗催。



雙瀨

壓頭斷岸碧孱顏。拖碧清流曲似環。愧少化工杜陵筆。負他蜀道好江山。

古城武田氏

笛聲入破將星墮。奕世山河一旦傾。斷礎敗甍尋不得。滿城叢竹碧縱橫。

御嶽

七年前事記模糊。仰望俯臨漫嘆吁。多謝山靈苦相負。田郎依舊一詩無。

偶成六言

樹上落花結子。竹間新筍成枝。點檢三春事業。祇添幾首閒詩。三人五人坐客。一縷兩縷香烟。西牕返照猶在。果爾日長如年。

白駒峯頭雲暗。濃鳥山畔雪明。靜中枉費商議。明日是陰是晴。好山蠟屐未遍。生客記名半忘。入夢多少故舊。淒然落月空梁。

聞災安政乙卯

塗說道聽疑是非。書來初信事如斯。反風暝酒恨無術。爛額焦頭果有誰。當日經營空費力。只今勞苦劇相思。高堂垂白雙安穩。聊慰江湖客子悲。

家信 二月十八日信來云。家罹災三月八日又得家兄簽授武學教授之報

四旬爲客滯山城。幾次書來憂喜并。倚伏從來塞翁馬。好將家信閱人生。

窩得路 元治甲子

誰能善戰勝難勝。千古偉勳有此公。日暮人稀窩得路。石獅高吼滿山風。

舟中呼韻十七首錄二

一帆直指翠藍西。背望蘇門山影低。一雙買得白鸚鵡。挂向船窓自在啼。慶應二月初一時發新嘉埠

世味近來薄似雲。人間得失不曾聞。梅花惟有能如我。清亦十分瘦十分。初四榜葛刺洋

留別三田君

明治庚午一月三日島驛

講經說史漫多時。敢道夷塗老馬知。刮目他年相見後。抗顏應愧錯稱師。

再航波寧

明治乙亥

裘葛已更十五回。那禁鬢畔二毛催。島夷相視笑相語。前度田郎好再來。

次韻平山竹溪君留別詩

明治戊寅君巴里博覽會事務官兼公使館書記官

蓮舟遺稿

寓尾日。有人以畫索題者。漫書數首。錄一。嘉永癸丑先生二十三

伊人不可見。遺墨有神情。四竹原公論。千秋不朽名。寒光牀上看。冷氣壁頭生。傾耳自還怪。如聞夏玉聲。

日野

安政乙卯峽府視學先生二十五

層層橫嶺白雲遮。日野津頭夕照斜。痴想今朝送吾者。此時各自已歸家。

小佛

踏遍連山翠幾堆。登登坂路往還回。望雲敢傲梁公感。也有思鄉淚暗催。

雙瀨

壓頭斷岸碧孱顏。拖碧清流曲似環。愧少化工杜陵筆。負他蜀道好江山。

古城武田氏

笛聲入破將星墮。奕世山河一旦傾。斷礎敗甍尋不得。滿城叢竹碧縱橫。

御嶽

七年前事記模糊。仰望俯臨漫嘆吁。多謝山靈苦相負。田郎依舊一詩無。

偶成六言

樹上落花結子。竹間新筍成枝。點檢三春事業。祇添幾首閒詩。三人五人坐客。一縷兩縷香烟。西牕返照猶在。果爾日長如年。

白駒峯頭雲暗。濃鳥山畔雪明。靜中枉費商議。明日是陰是晴。好山蠟屐未遍。生客記名半忘。入夢多少故舊。淒然落月空梁。

聞災安政乙卯

塗說道聽疑是非。書來初信事如斯。反風喫酒恨無術。爛額焦頭果有誰。當日經營空費力。只今勞苦劇相思。高堂垂白雙安穩。聊慰江湖客子悲。

家信

二月十八日信來云。家罹災三月八日。又得家兄簽授武學教授之報。

四旬爲客滯山城。幾次書來憂喜并。倚伏從來塞翁馬。好將家信閱人生。

窩得路

元治甲子

誰能善戰勝難勝。千古偉勳有此公。日暮人稀窩得路。石獅高吼滿山風。

舟中呼韻十七首錄二

一帆直指翠藍西。背望蘇門山影低。一雙買得白鸚鵡。挂向船窓自在啼。慶應二月初一時發新嘉埠

世味近來薄似雲。人間得失不曾聞。梅花惟有能如我。清亦十分瘦十分。初四榜葛刺洋

留別三田君

明治庚午一月三日島驛

講經說史漫多時。敢道夷塗老馬知。刮目他年相見後。抗顏應愧錯稱師。

再航波寧

明治乙亥

裘葛已更十五回。那禁鬢畔二毛催。島夷相視笑相語。前度田郎好再來。

次韻平山竹溪君留別詩

明治戊寅君巴里博覽會事務官兼公使館書記官

臨歧且要巨觥酬。休唱驪歌三疊愁。載筆何人能耐任。賽奇有會得重遊。范韓勳業期他日。李郭風流同一舟。同航有鮫島公使河上君諸賢送別聊賡留別句。贈言敢道重琳球。

遊西山

宦跡滯燕山。三度換鷓鴣。埋頭空簿書。束身困簪笏。似婦閉在車。如兔罹於畢。壯懷不可申。仰梁漫鬱怫。漸儉公事閒。膏車試一出。惠風扇微和。恰遇暮春日。驅出西直門。如驥脫繯逸。免得城裡塵。征衣不須拂。湯山古離宮。溫泉今猶沸。天子勞宵旰。不復駐玉蹕。悲哉十三陵。憑弔客心怵。石人立夾路。介冑而黼黻。摩挲誰垂淚。遺事史氏述。伏莽肆鴟張。厄遭陽九孽。青衣辱何甘。泥馬走不屑。慷慨殉社稷。景山帛一匹。遺詔莫傷民。有君無臣弼。興敗真有數。奈何其亡忽。居庸山如屏。雄關推第一。字刻景泰字。國步知輓軌。

獨木支傾厦。于公邦之傑。遺廟尙輪奐。千載仰壯烈。出關孔道仄。谿石苦凹凸。蹇驢鞭不前。十步三四歇。冷冷聽水流。入耳聲清越。得名彈琴峽。憐其協呂律。八達嶺插雲。登臨心胸濶。罡風吹人倒。瞪目又撟舌。荒草高沒腰。鐵砲埋半折。低徊認當時。崇禎字髣髴。妙峯山峨峨。縈紆石磴屈。香火娘娘祠。抱孩期可必。愚氓愚堪憐。一步一屈膝。行到翠屏山。山氣真幽絕。上有喬木茂。下有清泉瀑。愧非謝康樂。舐毫嗟才竭。長林抱伽藍。褻然有臥佛。靜現涅槃姿。足使塵妄滅。聞說此間寺。建自前明末。椽奴弄威權。內顧自悚慄。願修來生福。苦海祈濟拔。不知無功德。金碧比塗血。清冷玉泉水。潰沫如白雪。一掬沁肺肝。文園可醫渴。石橋長百尺。遙望似虹霓。石舟重萬斤。藏壑無人竊。圓明園長閉。土墻處處缺。猶堆劫餘灰。往事怕細說。失信挑強敵。禍生駭倉卒。千萬犒軍金。纔免社稷失。

平生誇華夏。城下盟何巖。有寺名檀栢。年歲多歷閱。聞自李唐時。殘碑多折蹶。地古松亦古。老幹詔孤佩。狀似狂龍狂。爭珠互掣掣。喜得數月遊。足解胸間結。杜陵賦北征。體物悉曲折。退之詠南山。遣辭稱奇詘。古人既逝矣。遺風庶可掇。飛黃絕其影。仰趾愧跛鼈。歸來小齋裡。坳硯墨汁滑。三更熒青燈。漫然一走筆。

吳江舟中

雨濛濛裡一刀輕。截水櫓柔微有聲。兩岸桑田青不了。塔尖遙認嘉興城。

居庸關于忠肅祠

杙豎弄權當竈場。土木之變事倉皇。喪君有君定金甌。郈王不比宋康王。將傾大厦支一木。未剝夙旣見陽復。神算獨運有何人。正色立朝于忠肅。何物徐瑄敢論天。漫將鍾簾議南遷。背城一戰寒

虜膽想見擐甲率士先。易儲休咎無論列。吹毛求疵肆詆訐。大臣殊乎事君人。以安社稷而爲悅。意欲二字將誰欺。與莫須有同一噫。當時東市慘碧血。卽今此地屹崇祠。吾來下馬春之暮。繚亂桃花迷嶺路。回頭居庸雄重關。居然千載金湯固。人世生死何足論。留取芳名汗青存。歌罷楚些三歎息。如見雲旗降英魂。

謁岳忠武廟

兩宮沙漠痛何言。千古人悲三字冤。臣志未能終北伐。天心自欲棄中原。靈旗猶有風雲氣。祠樹長含涕淚痕。寂寞騎驢湖上客。一般遺恨一般論。

圓明園

十里宮垣傍水涯。朱門畫鎖滿蛛絲。道是官家避暑地。墻缺儘從馬上窺。石人無首石柱倒。何辨當年堂與輿。琉璃瓦碎委蒿萊。狐

兔驕跳鴉鵲噪。荒涼若許何由然。低徊吾欲問青天。傍有野老揮淚說。時在咸豐辛酉年。失信招寇將誰咎。聞有蕃王爲戎首。火輪破浪鐵鎖沈。十萬橫磨劍何有。八里橋頭暗氛埃。一朝胡騎駭飛來。三月未滅咸陽火。歷劫空餘昆明灰。既不知彼何知己。一蹴浪試黔驢技。可憐謀國無有人。城下之盟春秋恥。君不見康熙御極我武揚。北邊羅刹曾跳梁。剪之朝食非不難。猶託唱蘭費協商。明主自有經邦策。畢竟隣交重玉帛。奈何後昆不能遵。空使行客泣陳迹。嗚呼空使行客泣陳迹。

梧竹翁自長城携一磚歸。謂秦時物也。使琢成研爲作短歌

長城磚盈尺。琢成研堅于石。不數銅雀兼未央。摩洗獨認蒙恬蹟。磨來墨汁積一斗。擘窠字就駭奇闢。世上俗書尙姿媚。任他群兒

笑啞啞。且并此硯藏卅年而後出之。使人奉以爲人間之至寶。天上之玉册。翁自謂予書經卅年應名世。

野菊甲申九月

甘共蓬蒿同託根。秋風秋雨鎮消魂。羞偏熱客金錢埒。愛傍高人白板門。泉激泥封誰護惜。鴻來蛩病互溫存。知心不遇陶彭澤。索寞生涯莫與論。

大沼枕山云。倪壽峯曰。詩新則清拔。此篇頭聯。無愧此語。

高漸離擊筑

擬將一擊挫強秦。矐目看他幾苦辛。拚得此身酬死友。留將遺策至韓臣。滿車鮑臭沙邱路。半夜狐鳴野水濱。地下知君應大笑。澤邊況有斬蛇人。

宋太祖雪夜訪趙普圖

兒有大志應如是。點檢居然爲天子。翼參幙中況有人。君臣際會魚將水。半夜行酒呼阿嫂。門外雪片積盈咫。畫灰借箸計密勿。削平不復勞折箠。希夷仙人開口笑。百年太平從此始。畫工巧寫當時景。欲使志士按劍起。可惜半部論語藏巾箱。不讀託孤寄命章。蓋棺論定千載下。流芳不及遺臭長。

枕山云。藝祖之得天下。固非正道。然平五代之極亂。以活民庶。是所以得百年之太平也。末段爲趙普傳之贊。據遷史之例。則贊中有論而具是非得失者也。趙普有始而無終。是故流芳不及遺臭。由是觀之以終爲要也。

園梅漸開有感舊遊

丙戌二月七日席上分韻

夜雨洗檐端。無復昨雪封。小園回微暖。已見梅蕾鬆。憶起去年夢。美人林下逢。翩裊翠羽舞。憐渠好丰容。相晤莫相疑。遺有形管彤。

人生如寄耳。難尋鴻爪蹤。獨傾酒一盃。澆此磊塊胸。

枕山云。莫相疑。為少陵之詩題。彤管為詩經之語。人生如寄耳。鴻爪泥。俱為東坡之句。作者信手拈來。皆得古典。典雅可貴。

劈柑獨酌

脩蛇赴壑線難牽。夢裡風光又一年。百事紛紜聊復爾。半生慷慨亦徒然。從無白髮能饒髻。那有紅塵可息肩。自遣自斟家釀酒。紀南柑子擘來鮮。

枕山云。家釀酒應屬謙語。必為伊丹酒也。酌攝酒。劈紀柑。亦是殘年之樂事。暫忘百事紛紜。而得十分之詩興也。

冬夜聽雨

寒雨浙瀝洒塔陀。饑鼠偷上烏皮几。夜半酒醒萬感并。臥不成睡攬衣起。青燈一穗結繁花。冷風吹皺窓樵紗。四壁蕭然人籟靜。猶

猶一犬吠隣家。童子鼾眠喚不醒。擁鼻微唸形贈影。故人往往化異物。尺振八箕作秋坪共逝功名畢竟屬畫餅。噫嘻人生浮若塵。何事愁悶何事嗔。祇應隨時儘行樂。甘作醉生夢死人。

枕山云。儘得行樂。作此快篇。豈為醉生夢死乎。此快篇可得千歲之名也。

長醜亭上送梧竹翁歸鄉。席上作歌。用太白草書行韻。

我與梧翁交無素。祇聞書名擅獨步。海外始逢傾蓋歡。回頭十年走烏兔。小西湖上天氣涼。今日重會在一堂。漠漠秋雲瀟瀟雨。荷葉敗殘月無光。井梧葉颺蛩在牀。斯時送翁祖席張。三疊陽關歌動座。俯仰今昔感茫茫。三冬燕京寒龜手。臨撫日盡墨一斗。早起徧搜古碑版。老餅在懷滿街走。當時事過如掣電。歸來文場試一

戰。換羊換鷺人爭求。一朝日下名聲徧。揮灑居然壓群英。可知翁不虛得名。姿媚義之詎足數。運筆橫掃空千古。平等觀作欵側字。紙上墨花飛欲舞。

聞錦山入京有寄

斯人未合老巖阿。經濟文章兩不磨。幾見浮雲遮日月。從知平地立風波。心因能定窮愁慣。才到稱奇坎坷多。今日廟堂親吐握。時疑響屨夜深過。

感遇

庚寅是歲
先生六十

羲農是何世。管樂是何才。縱橫是何策。治亂是何胎。開卷何燦列。掩卷還疑猜。吾生今白首。鷓蟀六十回。桑田與碧海。回首安在哉。盧枕黃梁飯。蝻穴南柯槐。營營何所爲。徒被彼蒼哈。往者既如此。可以知未來。

盆松歌癸巳一月

誰擒三百六十鱗。蟲長。囚在盈尺之瓦盎。之而鱗甲張鬣髯。直欲呼風駕雲排閭闔而上。莫謂其性不可馴。牀頭坐對意相親。只覺魏徵倍媚媚。極瘦駁處氣如春。好伴詩人同結歲寒社。泰山之上大夫之封何爲者。

瓶子倒

昔曾嘲瓶子眇。今且詛瓶子倒。挂首起舞者爲誰。平康賴官檢非違。謀事草草機事洩。西八條邸簇赤旗。打地響喊撼屋。帆影杳哭頓足。祗有西光稍強意。餘子畢竟皆碌碌。君不見鼠未巢馬尾。眇能視倒仍起。

白芍藥

穠華畢竟與心違。肯使群芳妬著緋。繡幙重籠春駐跡。銀雲輕託

月增輝。風吹不賴朱旛護。腰束應羞金帶圍。兩髻星星詩客老。好携素手賦同歸。

詣吉田竹里墓癸巳十二月

阮籍多白眼。灌夫亦罵坐。古之傷心人。狂態時間作。先生抱異質。不屑巴人和。字字珠與玉。隨風散咳唾。吾久與君友。文詩相切磋。談到心契處。傾倒顏爲破。豎子漫成名。斯人竟坎坷。一盃酬九原。新墳黃泥澆。

向山黃邨云。可當一篇祭文。河田貫堂云。古意古調能盡竹里之平生。讀了不覺涕淚之潄潄也。杉浦梅潭云。竹翁有知此篇。應感泣九原又傾一斗。

甲午一月念七。黃石先生會諸名流於星岡茶寮。僕亦叨末。賦呈乞教。

宇宙有至文。雲霞吐光怪。性情有真詮。心聲發天籟。所以詩也者。其道關否泰。三百吁尙矣。離騷道其派。漢魏比宋魯。齊梁等曹鄴。三唐作者興。乃如齊晉大。集而大成之。從此具體例。逮宋元明清。流風方未艾。吾邦雅頌聲。不曾遜海外。上溯懷風藻。斐然開風會。慶元韃囊後。文起千歲廢。丈山措詞樸。羅山下筆邁。南郭與南海。巖巖雙峰對。蛻巖又玉山。波瀾鬪澎湃。別有源白石。拔戟獨成隊。黃薇菅茶山。君子其言藹。南豐廣淡窓。吐屬無纖瑳。出語多驚人。世推山陽賴。其餘幾十家。有色又有態。譬如蓬山宴。郡仙鳴劒佩。後起星巖翁。特稱得三昧。衣鉢之所傳。茫茫幾人在。先生八十四。髮皓其顏晬。忠孝本家訓。詩書饒沾溉。餘事作詩人。浩氣乾坤隘。中蓄古性靈。外洗凡鉛黛。人之所難言。言之無窒礙。人之所欲言。言之彌俊快。歸然魯靈光。齒學歷時輩。於戲可謂音。足鼓吹昭代。

古劍篇

金星閃爍羅星文。提而一揮立殺人。鍛成既經八百年。歎曰正宗
鑄字真。有知我者肯自惜。報仇斬姦任客借。寂寂鞘中不能甘。一
夜冲斗光千尺。時平還無戎馬虞。如是抱負有若無。空伍金岡之
畫道風字。酒間茶後佐清娛。

秋感四首

祝融煽殘炎。苦如在囹圄。清風昨夜來。四壁秋蟲語。碧天澄似水。
銀河耿牛女。爽氣襲病軀。漸怯單絺紵。好讀古人書。燈火不負汝。
庭前有高樹。柯葉何盤紆。侵晨宿鳥散。亭午清陰鋪。西風挾秋至。
微雨與之俱。颯爽洗煩暑。怡然得自娛。長安多熱客。車馬競馳驅。
強令烏學鵲。不管馬馱狐。營營何所得。落得促白鬚。所以古人云。
大智却如愚。

秋燕辭我室。秋蟬鳴我林。秋氣清我簾。秋風拂我琴。我心如止水。
不容外物侵。祇有老難遁。白髮驚滿簪。高誦秋聲賦。歐陽是知音。

黃邨云。連用五我字。最見老手。梅潭云。句句疊秋字。結末出
歐公。奇恣縱橫。繁而不沓。

吾心愛寂寞。性與秋相似。悞為功名想。竿木曾呈技。面目非本來。
宜也招詬訾。時拌黃墟醉。儘慣白眼視。纏綿剩詩魔。揶揄有窮鬼。
何日江湖上。茫茫濶烟水。鱸魚活上俎。蓴羹滑溢匕。

黃邨云。我亦與作者同感。而有智無智。何啻三十里。讀罷。爽然
自失。

秋郊觀刈

金風亘平野。黃雲連陌阡。今歲陰陽調。果見大有年。何為村翁面。
菜色仍依然。吾欲慰其勞。招手使少前。聖主恤民隱。農事最在先。

况且廊廟上。輔弼盡名賢。經綸采輿論。百揆莫自專。或云減租率。一半從免蠲。或云嚴丈勸。課租期不偏。須俟數年後。會得息汝肩。村翁掉頭說。請君且舍旃。減租非不仁。徒爲兼弁便。不拯窮民窮。日食山餬餽。况乃勘田畝。東西奔吏員。屣履給多費。乾餼不容愆。言之膚生粟。何可再三焉。所苦在其外。傾耳幸垂憐。法網日漸密。五刑過三千。眼看囹圄裡。囚徒相塞填。衣之且食之。無非良民錢。王政重庠序。武城遍歌絃。兒童語言好。落得怯力田。所益無分毫。徵課比屋駢。吁嘻氓之蚩。所見何其顛。其顛雖乃爾。未必無眞詮。古人有金言。治國如烹鮮。

黃邨云。說盡當今治民之弊。爲縣官者。寫一通。揭廳壁。朝夕觀以爲戒。梅潭云。以問荅敘民情。亦是香山遺法。貫堂云。假村農語。切言時弊。頗當肯綮。結末有力。

病起示門生

滿庭風露授衣初。自喜新涼病頓除。劍吐長虹心尙壯。鏡含微雪鬢將疎。千金漫學屠龍技。一紙何煩荐鸚書。不是侯芭能載酒。寂寥誰問子雲居。

憶昨行

憶昨少年時。肝膽空輪囷。自命爲人傑。期貌畫麒麟。曾誦聖賢書。尋章摘句厭其陳。曾獻長楊賦。簪筆不屑爲詞臣。高論有時驚流俗。提壺隨處買青春。不啻世人皆欲殺。踈狂每被官長嗔。偶際滄變。甘作葛天民。何圖辱洗刷。省閣拖長紳。拖紳雖乃榮。吾心不得伸。平生倔強性。抵死不可馴。羝羊觸藩羸其角。孤桐入爨摧爲薪。能言自許拒楊墨。望氣不解識金銀。抵償夙生風月債。不蹈當路權貴門。老去毘毘今若許。窮鬼擲揄錢神慳。不儒不佛不神仙。

不吏不商不隱淪。日拈不律事吟咏。詩瓢酒盞結前因。得句投囊鬼昌谷。死便埋我狂伯倫。有時散髮露頂忘巾幘。有時披風抹月摘星辰。不憂釜中生魚衣百結。將道榮者却辱富者貧。噫嘻乎如是而死。不知世人目我爲何人。

黃邨云。筆力奔放棄學識兼至。敬服感服。貫堂云。俯仰低回。句法長短。莫不當節。詢爲傑作。又云。結末飄逸有致。梅潭云。提壺二字。伯倫伏線。良工用意精密可喜。又云。氣骨渾成。縱橫盡意。蓋長短句法。宗謫仙傲仲則者歟。依田學海云。何圖四句。幹旋極苦。是非老手。難於著筆。祇償四句。出脫得妙。趙公子。司馬長卿。亦是等故。吞吐出沒處。非解胷中之秘者。不易見也。

四皓圖

臣聞太子孝且仁。不似陛下謾罵人。皓白鬚眉衣冠偉。直言犯顏

不能噴。何翅不噴還心喜。如是羽翼足可恃。身後縱有反覆徒。不待周勃安劉氏。談笑能令君心回。子房運籌果奇哉。史書所傳太愉悅。假託往往有人猜。是假是真且休想。妙手繪出儼其像。輝映龍門之史筆。兩見光燄高萬丈。

大洗觀潮

茨城之東大洗鄉。遠面萬里太平洋。朝潮暮汐通米洲。吞日吐月望茫茫。吾來秋高恰九月。洪濤拍岸氣蓬勃。岸有巨岩不肯讓。相排相擠爭齟齬。乍疑銀河倒瀉來。又訝天柱俄頽催。不數胥馬與錢弩。捫腹愧無木虛才。聞說海洋島畔黃海裏。旭光輝處黃龍死。隻甲片鱗留不得。血染海水海水紫。偉觀何啻今日游。吾欲賤目而貴耳。

柳岸垂釣

楊柳汀邊雨未收。釣竿在手綠蓑柔。一生知己惟紅友。萬事無心有白鷗。祇怕羊裘來物色。將羞熊夢感王侯。故人多少青雲上。老健還能似我不。

黃邨云。翛然與世相忘。類有道者之言。貫堂云。紅友白鷗。羊裘熊夢。對仗精確。

高士聽泉圖 憶起故友吉田蕙坪所贈畫用東坡烟江疊障圖韻

蕙翁畫學文衡山。細皴薄抹生雲烟。樹分遠近山向背。慘淡經營歸自然。絕巘凌空千萬尺。下有詩人坐聽泉。獨木橋下清流駛。知到人間成巨川。憶昔題襟墨江畔。夢紅浴碧氣無前。詩成筆花眩五采。酒罷歌聲徹九天。心契蒼松與翠竹。愧同凡卉鬪春妍。豐城作客空談劍。陽羨無心去買田。天涯地角各分別。不接音容二十年。遠道思君君思我。落月屋梁影娟娟。一昨之年游屐過。匆匆不

得聯榻眠。手緘此幅遙相寄。喜從畫裡晤畫仙。爾後鴻魚成斷絕。騎鯨化去辭塵緣。裝池珍重故人意。提筆賦就停雲篇。

貫堂云。俯仰曲折。極自然之致。不為韻脚之所拘。敬服服。

梅潭云。筆氣縱橫。語意超脫。不敢押韻。詩格似蘇。黃邨云。思路深幽。筆姿蒼潤。其步韻更極自然。

僧房遇雨

山深風光靜。居然似太古。一龕坐老僧。半日參談塵。乍見前峰腰。縷縷濕雲吐。須臾灑天黑。大於大鵬羽。樹杪聲澎湃。陰陰聞雷鼓。知放鉢裏龍。去作一天雨。滌此世塵紛。解此炎氣苦。合掌我知悔。平生罵佛祖。

黃邨云。筆挾風雷。變化縱橫。不可端倪。

濱村薇山八百松樓宴集席上卒賦

秦璽漢印跡渺茫。彫篆刻籀推擅場。四世名家人誇說。盧橘花傳一枝香。不論玉石與銅鏡。如泥一似昆吾切。刀尖觸處蛟龍騰。妙秘得無有家訣。曠懷况復絕時流。拍肩洪厓期同游。時出偏師撼詩國。俗白輕元皆低頭。造化小兒性多妬。奇禍不怪一朝遇。禍耶福耶何所分。得馬失馬塞翁悟。綠陰幽草正及時。大會裙屐舉酒卮。觴咏坐多不速客。箕裘家有寧馨兒。患難玉女古來有。會見輝映先與後。不弔而賀賦一篇。愧我才非柳子厚。

梅潭云。混同禍福。曲折深至。信手說來。何等才筆。薇山得此篇。當浮一大白。貫堂云。措詞縱橫。極是老手。黃邨云。薇山會僕亦有贈詩云。宴樂焉知憂患初。功名多出阨窮餘。人皆欲弔吾讎慶。讀取河東賀火書。今拜讀大作。不覺瞠若於後。

僧舍寒甚醉而作歌

凍雲黝黯凝如墨。六出飛英費彫刻。兜羅綿裹大羅天。白銀宮闕玻璃色。不耐奇寒砭骨侵。何妨打破山門戒律森。泥頭擘開香衝鼻。獨坐禪榻獨自斟。一杯入口又到臍。下睨俗曹狗耶雞。飲酒爲戒小乘耳。要應醉裡證菩提。何翅飲酒不足戒。有時殺生亦不礙。折服攝取同一法。念佛不在空諷唄。不見我皇一怒斯興戎。殺以止殺仁在中。觀音手裏不動劒。六師到處艸偃風。只懷軍士征帳裏。紇干凍雀奈何死。安得把此壺中物。灑向北天如注三峽水。雙破飲酒殺生律。而使大雄氏生大歡喜。

黃邨云。筆鋒快利。有呼雲走雨之妙。梅潭云。全首凝神注思。一字一句不苟。用典切于本題。乃所以爲老手。貫堂云。一杯以下宛轉如念珠。真是廣長舌。

飲馬長城窟

雪片撲面大似掌。馬腹陷沒馬首仰。長城窟凍澤腹堅。飲馬不得一滴泉。男兒從軍行萬里。報國只知有一死。死且不怯何怯寒。一任龜手與墮指。同其袍兮同其仇。殺敵之外無他求。不想貌圖雲臺上。金印挂肘爵封侯。

讀征韓史

世民頓兵遼水東。乃與隋煬同其終。手滑往往不知止。如是末路笑英雄。閱史偶到壬辰役。浩歎此事將無同。海內瘡痍未全癒。休養不計治道隆。驅之干戈委鋒鏑。佳兵纔自慰情鍾。鰥域人民有何罪。聃耳百萬築塚崇。兵法戒驕又戒貪。果然七年無成功。稱謂偉略高千古。毋乃目瞽而耳聾。比之今日西征舉。弁觀庶乎發其蒙。猶恐不戢或致焚。竊希及早棄其弓。西疇時及春耕好。霏霏連日膏雨融。

培菊

花夢既惺忪。輕寒尙履屢。鵝鳩不停鳴。勸我試種蒔。我無五頃田。叱犢力耕治。讀書窓之外。立錐纔有地。分得黃菊根。賴有好友寄。兩餘土脉鬆。二二三手培植。預期秋高時。對之博一醉。沽酒偶無錢。或有白衣饋。

苦熱

當頭火傘土生烟。無奈炎蒸六月天。制勝有方存不戰。頽然一榻北窓眠。

觀鎮遠

潮頭疊白風吹急。沙岸千人萬人集。道是新獲鎮遠艦。今日方向此港入。艙上礮塔兩邊舷。三尺精鐵巧裹襲。受彈四百一十四。痕如蜂窠猶屹立。東洋獨擅第一名。宜哉當時稱靡及。奈何旭日瑞

光東方升。妖雲掃盡黃龍泣。遞來隔海千里遙。風淒汽笛聲空澁。
於戲乎天下無敵惟有仁。利器雖有奈無人。一死獨憐丁提督。不
負愛親覺羅骨鯁臣。

圈虎行

鈎爪鋸牙毛錦斑。猛虎蹲在鐵之欄。負嵎餘勇安在哉。銅鑼鳴處
供人觀。一投塊肉一聲吼。豎尾還同搖尾醜。挈攫逞威威不威。兒
童嬉嬉笑開口。在山則君市則奴。乍起乍仆隨指呼。區區徒戀象
養惠。可騎其背可捋鬚。于嗟乎偶為人用却為鼠。使予欲怪古人
語。

祭詩

一杯濁醪一把菘。祭詩供具不要豐。我聞古之人有言。畢竟詩以
窮而工。竈裏丹汞不祈壽。門前舟車不送窮。拈鬚呵凍書青詞。我

祭我詩歲之終。落托江湖空白首。晨星散盡聯牀友。輪蟾環鳥迭
走駛。惟我與爾日相守。二句三年一吟淚。性命相依稱耐久。吁詩
爾來享我饗。月地花天慎勿輕孤負。不見當年華屋今蓬蒿。萬頃
肥田無半畝。又不見北邙山下冢纍纍。誰酹生前一杯酒。樺燭光
裏共斯夕。何不一醉笑開口。自今之後五百年。惟有爾使我不朽。

歲暮雜感

白衣蒼狗漫紛紛。洛蜀是非難可分。西海鯨鯢揚濁浪。北山猿鶴
有移文。荆公河朔空招謗。王安石為相。容逸所請割河朔地
七百里。曰將取之者且與之云云。介子樓蘭不
策勳。傳介子使西域矯
詔誘殺樓蘭王。自笑詩人無事事。送窮殘酒一杯醺。

黃邨云。用典確切。貫堂云。筆力健摯。後聯尤妙。梅潭云。洛
蜀是非。淵源河朔。不堪感慨。吾儕閑人唯飲濁酒。錢殘年耳。

讀書偶述

夏蟲輒語冰。井蛙漫謗海。世間多少人。搖頭強索解。讀來萬卷書。誰超出窠臼。君見雙秋波。通情捷於口。矮人不知矮。觀場徒喧囂。曹參能殺人。桀犬可吠堯。

雪霽

夜雪今朝霽。有似宿醒醒。疎林猶殘白。遠岑妝愈靚。欲躡沙棠屐。尋此熹微景。前邨况有梅。清芬矜孤冷。野渡水未渾。植杖喚小艇。

題荆公集後

萬言獻策偉抱負。堯舜湯武念在口。垢面囚首坐講經。名聲高見凌北斗。得意遭遇神宗知。沙門善神環左右。黨同伐異事更張。當年氣焰可炙手。青苗法行天下怨。宋室南遷將誰咎。日以巨姦以誤國。吾曰唯唯又否否。臨川有集文與詩。千載之下可再披。上追韓柳與李杜。下與歐蘇足相持。孤峭內含豐腴味。雪裏老梅可比

之。何人諂以野狐精。辭如相排意相推。要之讀書與經國。斷是兩歧非一歧。我欲依公判爰書。誤國則是姦則非。君不見周官爲治有蘇綽。亡齊興周饒方略。又不見明代儒宗方孝孺。畢竟不免鐵錯鑄。寄語人君欲用才。徒莫學問許鹽梅。不學無術漢霍光。麒麟閣上姓名魁。

輞川積雨圖

淋漓潑墨痕模糊。眼前咫尺卽江湖。右丞過去千年久。誰傳輞川積雨圖。神物顯晦不可測。單有心者乃能得。藏以玉匣襲蜀錦。黃金千萬不計直。玩物喪志古所云。毋乃不免世俗群。胸中涇渭自然別。紛紛讒毀耳不聞。耳不聞兮手摩撫。鍾情劇于女十五。多人舍舊新之圖。我祗信而好其古。

畫石

不遇媧皇補天缺。還被祖龍鞭流血。骨相自負輪囷奇。空教雨淋而苔齧。好事偶有山人在。傳神潑墨一揮灑。好似千里駿馬骨。脫手萬貫人爭買。假者何貴真者不。葉公之龍多効尤。再拜我題數行字。不知斯石解點頭。

雜詩六言限韻九首錄二

筆力雕龍繡虎。詞花摘艷薰香。古今幾許文字。玉尺何人打量。男子從軍萬里。沙場曝骨名香。奈何行屍走肉。多似車載斗量。

苦蚊

燕頷虎頭飛食肉。乃出水中么麼族。日暮殷殷作雷鳴。飛揚跋扈圍我屋。團扇揮來臂欲僵。單衫被處膚生粟。千瘡萬孔湊一身。癢處搔時指為禿。無乃朱粲是前身。化作萬千謀果腹。豈無粉黛掌中碎。獲一漏百不堪戮。畢竟寡者不敵衆。飛絮乍見櫻桃熟。便使

火攻出下策。焚蒿未能全軍覆。薰烟刺目目欲盲。涕泗橫流如箭鏃。鼯鼠何堪弩機張。青蠅哂他拔劍逐。吾欲袒裼牀下臥。舍此身軀飫彼慾。縱令一夏三月九十日。計啜我血當不盈一斛。君不見世間害人猶多類。沙中有蠆草間蝮。

古戰場

此古戰場也。天陰聞鬼哭。猿鶴蟲沙不計年。野燐焰作苔花綠。黃狸黑狐夜開讎。鬪體爲椀羅羞饈。好似當年將軍奏凱還。飲至錫享甘泉殿。于戲乎世上祇知戰捷功勳尊。無人解招未歸魂。

郊外步月作

逍遙步清夜。手支藤一幹。身背城郭遠。意行逕田畔。仰首見明月。徒爾發長嘆。吾生六十六。圓缺八百換。少壯能幾時。瞥眼一昏旦。爾月渾不知。照我光凌亂。中懷乍棖觸。與月提一案。朱門饜梁肉。

市僧營計算。心昏眼亦盲。對月如不看。惟有吾輩人。春秋隨時玩。邀之以尊疊。贊之以詞翰。形影成三人。氣味如一貫。胡爲少區分。一例清輝爛。爾爲天眼睛。畢竟莫剖判。不怪蝦蟆精。噬爾如餐飯。月亦如有羞。匿雲忽逃遁。歸來擁衾臥。夢有蘇髯喚。吁汝何么磨。肆肆無忌憚。胸貯不平氣。風流減一半。詎不自己省。必遣背流汗。所以真閒人。世如懷民罕。舉手相揶揄。開口笑齒粲。

黃邨云。試代桂館主人。開侮辱裁判。東坡爲判事。與判決。則雖有幾多辯護士。被告之敗訴。無可疑。而傍聽張懷民之輩。必舉手揶揄。作者以文滑稽。不過如此。妙妙甚甚。貫堂云。起伏頓挫。極遊戲之致。梅潭云。中懷二語。提起後段。過度借髯蘇爲陪襯。以伸胸間鬱屈。何等老手。

秋懷

涼夜常不寢。更漏忽已沈。戶外促織鳴。淒然驚客心。遠砧互相答。幽杳不可尋。堅臥彊交睫。陶然閱古今。老猶壯心在。夢唱梁甫吟。

秋海棠

休恨彼蒼恩寵偏。開花曾負艷陽天。一生零落西風裏。翠袖紅粧絕可憐。

鴨綠江

鴨綠之江長白山。兩邊自古屹重關。憐他防守無人在。委我摧殘反掌間。硝霧黑藏危堞暗。血痕紅漬伏屍殷。陣頭立馬手揮策。若見將軍笑破顏。

受降城

不須新築受降城。拔彼龍旗立旭旌。示義之師兼示武。因糧于敵又因兵。何時干羽舞堦靜。會見天河洗甲清。斯待來年春漸滿。好

蓮舟遺稿
教寰宇醉昇平。

日出邦

邦號日出日爲標。普照靈光妖忽銷。電掣雷轟天黯淡。櫓傾檣折海清寥。多年空怵羊粧虎。善價誰沽狗續貂。聖武吾皇南面坐。東洋深受百川朝。

偶詠

紛然百感集。拈管作鴉塗。一事堪深幸。硯田未課租。

有友自臺灣歸。共飲某亭有作。

蓮幕高談虱手捫。斯才知不老柴門。撫民能判良將莠。施政尤兼威又恩。偉蹟久傳新附地。征衣猶著舊濤痕。燈紅酒綠三更雨。喜得今宵對榻論。

雞鳴曲

羲和長鞭鞭杲日。一線紅破天如漆。承氣之先鳴膠膠。千戶萬戶其聲一。爲跖爲舜非所知。造化太公無一私。

贈少年

負笈遙遙來千里。問其所求功名耳。功名畢竟何爲者。邯鄲黃梁槐安蠹。晨昏問安乖有年。薪桂炊玉況不便。不如棄汝千金箒。荷鋤歸耕二頃田。

水仙花

洛妃猶剩未招魂。移向幽齋小玉盆。袖剪綠羅雲有影。冠粧白璧月留痕。依稀舊夢三山遠。隱約微詞一賦存。仙種原非人界物。攀梅不許弟兄論。

王昭君

一見君心動。姿容冠六宮。輕盈蓮出水。嫋娜柳迎風。美自恃天質。

賄何買畫工。哀彈絃響澁。夢泣淚痕紅。眼望帝京遠。書傳邊雁空。
和我力不少。去國恨無窮。薄是佳人命。忠成絕代功。雲臺如繪象。
衛霍得相同。

貫堂云。五排正格。句句穩巧。黃邨云。可當昭君小傳。

春山讀書

落紅埋苔碧。下山疑無路。平瞰雲中峰。歷歷棋子布。昨夜一雨過。
笕泉聞為怒。將見蕨芽茁。供厨無內顧。山居與人遠。單將吾嬾護。
非欣巢由隱。又不仙佛慕。南軒鈎簾坐。日日親竹素。羲農有何德。
桓文用何數。生死由何因。治亂基何故。開卷燦若火。掩卷昧于霧。
讀書尚心解。不在章與句。一旦豁然通。六經為我註。偏憐陳編裏。
多有枯死蠹。

潺湲聲

皺碧拖藍三尺深。流逢石罅有佳音。悲歌一曲漸離筑。絕調千年
中散琴。破夢殘宵驚醉耳。無人虛室證禪心。冷然更愛和松籟。同
伴吾儕擁鼻吟。

讀樊川集有感

線補王衣願不成。揚州花月證三生。英雄氣短無今昔。空博青樓
薄倖名。平生五色線。願補
王衣裳。樊川句也。

刪竹

此君不可無。此君不可多。忍刪十數竿。疎影見婆娑。昨乞自故人
手。乘醉移來植培厚。胡為今日遽若許。薄恩負心吾無取。是言祇
能知其一。不知張弛自有術。譬如秋殺與春生。上天之載豈一律。
齊國稷下學士昌。松耶柏耶住其王。趙宋朝稱多君子。泥馬不免
渡江徙。多乃成累少能珍。物理人事誰解真。欲愛篩月嬾風好風

致不妨利鎌手自親。於戲乎種藝養方揆一也。我欲持此告枋國者。

黃邨云。論出至誠。筆帶蒼竦。非老手難能。梅潭云。筆墨矜鍊。色澤古雅。與袁倉山芟竹詩異曲同工。岡鹿門云。此君不可無。古人已言之。此君不可多。人人不能言也。文理暢達。筆力縱橫。非胸藏古今之書。眼明政事之得失。安能有此傑作乎。的是至人之詩。

梅兒行

十里行沿墨江湄。長堤窮處有小祠。一株垂楊一抔土。道是當年葬梅兒。梅兒生長在閩閩。乃祖乃父衣冠列。一朝誤被匪人帶。居然生離成死別。生離身落千里遙。死別魂難九原招。婉兮變兮卅總角。可憐空作不秀苗。况有母氏遠蹤至。風餐露宿不曾避。邈矣

音容不可覓。江流有聲寂松吹。渡頭喚渡日影斜。真乳山上噪暮鴉。乍聞消息一慟絕。枉它來路山河賒。千載口碑傳哀史。休論烏有興亡是。演入梨園觀客泣。雖無此事有此理。

春歸

長繩何計駐春歸。坐遣燕鶯無所依。山笋抽尖經昨雨。酒帘褪色立斜暉。弄姿狂蝶夢仍懶。戀樹殘花吹不飛。遺物更餘青帝賜。池頭絮化水生衣。又遇東皇促駕歸。髻絲禪榻思依依。接天芳草迷癡蝶。滿眼綠陰殘夕暉。九十風光詩卷駐。百千情緒落花飛。新歡舊恨感多少。空有酒痕斑在衣。

彈琴

焦桐軫碧玉。吾藏一張琴。靜坐漫一彈。悒悒有妙音。松風如相契。

蓮舟運種
明月或知心。何必廣陵散。絕調按徽尋。有音便成曲。何所判貞淫。
有曲足悅耳。何所論古今。天籟之所激。萬物不肯瘖。蛙吠稻田裏。
蟬噪綠楊陰。

琉璃瓶中金魚

還似風鈴送好音。暑天涼味此中尋。金仙繡像吳羅薄。紅鞵凌波
洛水深。空幻影猶分細大。小生活也見升沈。晚來浴後南檐下。相
對尤宜酒一斟。

初秋夜坐

今夕是何夕。星河若許清。匆匆過半歲。落落老斯生。蘭簿多新鬼。
鷗波負舊盟。一杯長在手。不用世間名。

片桐且元

遺命托孤銘肺肝。將傾大厦欲支難。居然晨有牝雞唱。果見巢無

雛卵完。群小詎知臣節苦。孤忠祗計主家安。憶同七將話心處。和
水流寒夕照殘。

松平樂翁

身兼功業與文章。名姓真成百代光。世俗何分情與義。漫將濮議
薄歐陽。

丁酉秋送輓齋歸山

輓齋不肯住少時。飄然欲駕白雲之。俯視城中有何物。走者是肉
行者屍。男兒羞與噲等伍。生肉肉髀手空撫。人生所遇無定準。英
雄神仙皆千古。蒼蒼蒹葭露爲霜。接空秋江一碧長。嫣然笑把芙
蓉花。若有人兮水中央。流則能行坎能止。從古只稱盤谷李。長歌
送君君莫笑。巴調敢擬昌黎子。

領恩給書感

迂儒何敢說經綸。漫把齊竽久濫真。伯道無兒應委命。相如空壁也安貧。幽愁易改鏡中髩。勞苦徒嗟爨下薪。獨幸主恩深於海。斗升惠見及枯鱗。

上野舊交會席上

今是昨非將問誰。人生有淚感當時。可憐東照祠前路。仍舊櫻花紅幾枝。

信西

滿腹經綸學有源。莫將成敗肆評論。若教生佐鎌倉霸。未必功名輸廣元。

自咏示客自探得咸

何用平生問季咸。歷嘗世味別酸鹹。不營老後兔三窟。欲典家藏書一函。謁坐久忘持手版。吟詩自笑署頭銜。小園霜韭甘於肉。好

酌山醪恣我饒。

長安春望

駘蕩風光春過半。滿目櫻花開爛漫。名將埋骨青山阿。天女有祠碧湖畔。山阿湖畔簇人行。帚掃水灑塵不驚。街頭高結松棚綠。屋上輕颺旭旆明。松棚旭旆見交錯。衣香髻影認依約。游春如雲都人士。上臺領受熙熙樂。勞費一旦幾萬千。笑他空吝露臺錢。一國之人皆若狂。道慶奠鼎三十年。三十年間治教普。征清偉業快目覩。黃海破碎堅艦幢。赤嵌拓開新疆土。東洋牛耳執由誰。立威定霸在茲時。何爲急於飾太平。一味泄泄守其雌。不見遼海北。老鷲健鼓翼。不見琅邪灣。狂濤捲雪寒。狐心固應悲兔死。唇亡不知寒及齒。他人鼾睡臥榻側。欲粧不聞掩兩耳。吁嗟乎二億犒軍金。空教都人長侈心。集幕燕雀樂一時。先憂有人淚沾襟。

貫堂云。托春景詠時事。筆舌縱橫。狐心一段感慨甚深。田邊松坡云。茲篇體格。法初唐四傑之七古。換韻之處。疊前解之字。宏麗飛動。中段以下縱橫排宕。如快馬之不受羈絆。尤極感歎淋漓之致。

戲效香奩體三首錄一

小姑獨處轉愁予。掩戶慊慊歎索居。一任容姿盡憔悴。自將心事比芙蓉。白鴉久亂當前局。青鳥偏無去後書。爲問瑤臺舊朋侶。三春花柳近何如。

望天目山

笛聲入破夜月沈。湖底石槲無處尋。佳兵之禍延其子。孤立不堪四隣侵。楊竈况有二嬖在。奕世山河倏爾改。有婦徇夫子。徇父誰獲傳家無楯鎧。笹嶺西去驛路回。北望天目碧崔嵬。碧血千古化

溪草。毅魄嬌魂安在哉。君不見禍福從來相輾轉。螳螂鳴蟬喻言善。愛宕山頭梅雨昏。有人問本能寺溝深淺。

晚晴登城樓

返照在前嶺。遙林樹如薺。千里目無極。城樓百尺梯。天下今一家。久矣息鼓鼙。設險胡爲者。不須封丸泥。懷古低回久。蒼然暮色淒。滿地亂秋草。唧唧寒蛩啼。

鹿門云。議論精確。著筆溫雅。收結餘韻鏘然。

醉秋吟

我不知人生何處來。混沌初鑿誰胚胎。又不知人終何處去。蓬萊兜率杳無路。十千世界幾何人。無端著吾七尺身。天開地闢幾何日。有此三萬六千晝夜如箭疾。商飈四起天地鳴。千樹萬樹不同聲。誰耶名曰悲哉氣。畢竟因自己心中有不平。西隣沽酒謀一醉。

興酣何必唾壺碎。東籬有菊芳可餐。中天有月光何媚。多事登山臨水空。傷心欲瀉慟古慨。今之涕淚。舣船一掉百分空。用糟邱途坦不哭窮。吾欲千秋萬歲後。無有人知有乃公。

相逢行

昔年相逢古江戶。年少意氣吞寰宇。下筆紙上雲烟騰。出語舌頭虹霓吐。今年相逢今東京。滿頭白髮視互驚。吾云讀書苦目昏。君云聽話覺耳鳴。相逢地非異。相逢人不二。奈何地名殊。昔稱面貌况欲認不記。倏忽轉過羲和輪。三十年來事事新。一回頭顧跡茫漠。依然仍存夢中身。憶君北海駕巨艦。橫槩甘爲田橫客。報生以死士之常。不關人間論順逆。現今天地同一家。冷中金再躍莫耶。三置千金范少伯。君前不敢一語誇。予亦一時跛能履。脫却舊衫曳青紫。不免窮鬼巧揶揄。蕭然環堵今已矣。雲容沈寥秋天高。橋

頭柳條不禁縲。三疊歌歇日將暮。勸君盡茲一杯之葡萄。嗟君別予遠道去。雁落魚沈雲濤阻。今日相逢如許老。他日相逢在何處。如君精神死不亡。地下應作閻羅王。祇予平生風流多罪過。森羅殿前恐責情債償。爾時相逢幸毋見。如不見。及今預祈意中存戀戀。分付帳下青赤鬼。是我故人莫嚴譴。

日短行

挂肘不得金印大如斗。負郭還難多田稱富叟。此區區者不余畀。欲仰問天數搔首。羊何爲而觸藩。魚何爲而在笱。玉何爲而抵鵠。文何爲而覆瓿。租糶鬚眉傀儡場。自顧形骸駭老醜。百年無幾來日短。誰叱蟾烏使倒走。不若日日痛飲讀離騷。下視兒曹何雞狗。山坳水曲何處不可以埋吾骨。安用書空咄咄嗟不遇。噫嘻乎明月在天花在枝。人間樂事無不有。

細川賴之

守成與創業。難易比來同。平叛有餘力。託孤曾竭忠。五箴能飭士。三黜不爭功。尤見高人處。安眠禪榻風。

壇浦行

赤門奔潮流。湯湯夾岸青山迴。如廊俯瞰海水一帶耳。崖石觸濤爭屈強。幼時曾諳盛衰記。到此想起當時事。不知埋骨果何處。遺恨今存彌陀寺。鬼武霸業彼一時。鎌倉府跡黍離離。一成一敗骨俱朽。不須錯恨賣傘兒。

對月書感

銀河橫斜流大火。一霎時間中秋過。舊顏無恙天上月。皎潔光華復照我。梧桐葉驚秋墜。芭蕉葉隨風破。物猶如是況在人。茫茫世界如何可。且斟澗澗杯中酒。霜餘之蟹把在左。

買硯

誰搜端溪水。刷取紫玉膚。五寸方其形。砥礪有廉隅。背存兩行銘。剝蝕字模糊。知經數百年。古色蒼然殊。肆頭偶看之。驚歎喚嗚呼。不慳幾緡錢。爲汝少三舖。購來三摩挲。劇乎十五妹。可憐美盼兮。鸚鵡眼未枯。今古將問汝。汝能答吾無。汝處斯世久。曾與何人俱。或爲帝王佐。萬言贊洪謨。或作雅頌什。百世壯皇圖。或隨遠征軍。羽檄草須臾。或侍狂士醉。頭髮墨瀟瀟。或編千秋史。巨姦筆端誅。或記一片石。枯骨泉下諛。或在三家村。注鴨租魚租。或伴五陵豪。錄擲臬擲盧。窓明几淨處。子細黃庭摹。燭紅酒酣時。蛇蚓烏絲紆。筆不保數日。墨僅一歲需。唯有汝能壽。永歷幾兔烏。境隨遇而變。人與時不符。到今閱幾回。窮愁與歡娛。鵬臆無由對。石言果是誣。不責汝必答。唯要汝聽吾。告汝且莫嫌。來伴一腐儒。我誓不汝災。

汝無終始渝。他年吾將賦。二京與兩都。爾時依汝力。庶幾大雅扶。

哭岡崎西江二首錄一

天道真難問。斯人竟不留。時危曾攘臂。官達早回頭。好句投囊貯。奇書破產收。特欣獎善行。事業足千秋。

天王寺所見

參天古木風色淒。新霜滿地寒蛩啼。累累一帶土饅頭。某姓某名不可稽。入眼豐碑一丈高。上有顯者丹篆題。大字深刻何所云。居家孝弟刑于妻。在官能勤處事敏。守土有澤及羣黎。四至九卿司馬安。千歲之下或肩齊。巧宦如渠應無類。生貫不必菽與粳。狂態不學樊川杜。嬾性夙斥柳下齋。曲謹買得多人信。媚竈吠竇勞夏畦。水底罔兩不易燭。人間誰有温嶠犀。可憐巨石壓頭頭不昂。九泉之下依然低。

惜春詞

勾芒倒曳青旛走。促駕東皇不回首。千金難買一刻留。紫紫紅紅皆烏有。九十繁華一瞬中。吹過廿四番番風。吁嗟春去去何處。我欲搔首同上穹。解人獨有瞿曇在。為道空即是色色即空。

喜雨有作

松窓課讀書。字字細若蚊。乍訝看難了。拓戶漫烏雲。倏爾傾盆雨。聲在樹頭聞。樹頭聲滂沛。炎涼聲中分。三旬苦不雨。祝融張其軍。飲水徒增汗。揮扇不策勳。碧翁甚解事。一灑空炎氛。吾人得蘇息。茲事何足云。君試出門望。稻田青欣欣。

虞姬

楚帳重圍合。虞兮喚奈何。烏騅嘶獨騎。紅粉泣雙蛾。落日迷旌旆。春風冷綺羅。英雄悲短氣。兒女獨情多。舞罷驚鴻態。揮殘逐鹿戈。

美人三尺劍。子弟一聲歌。血蘸離離草。魂歸渺渺波。空留垓下恨。弔古淚滂沱。

秋柳二首追次漁洋韻錄一

曾繫馬邊空斷魂。黃墻東側小紅門。茫茫斜日寒無色。歷歷新霜悄有痕。三疊歌殘分袂地。一天雨暗散鴉村。西風憔悴幾多恨。付與瘦蠻容易論。

墜車折肩頭骨。就養名倉病院十數日。歸家追有

此作。蓋痛定思痛者。

意氣從來儘蹕騰。空招造化小兒憎。平生強項低如許。布綳頭骨今昂首不得

日吟肩聳不能。面壁九年堪坐久。夜每靠褥以睡不能橫臥控弦五石憶吾曾。北

窓過午涼颺足。難得繩牀一曲肱。

偶感明治三十一年戊戌

奈何斷藕有絲牽。回首經過卅六年。終世難填東海水。三生修到老婆禪。遏雲喉涸蟲同咽。舞掌身癭蝶可憐。當日藍田曾下種。看他美玉既生烟。

依田學海書後曰。厚於情也。臣殉其君而婦死其夫矣。薄於情也。視若仇讐。而將曰人盡夫也矣。然則忠臣烈士。貞婦賢女之節行。躋績。皆鍾情之談。心愛之說耳。若夫聞離鸞別鳳之曲。無一掬之淚。見哺烏禮鳩之美。無半點之情者。是負心之匹夫。薄腸之男子也。蓮舟仙客氣宇磊落。胸襟瀟灑。好義厚於情。少壯薄遊江湖。頗睨華麗。人以揚州小杜目之。然彼著罪言。原十六衛。以慨世事之不振。撰燕將錄。以述濟時之籌策。其為忠臣烈士也明矣。十歲青春。一覺揚夢。是亦情之餘也。頃者仙客誤自車墜。傷其肩骨。治療醫院。呻吟數日。愛種留根。殘艷猶香。躬調

湯藥。看護具至。仙客乃爲賦偶感詩一首。情致纏綿。音節悽惻。意切乎懷。而感溢乎詞。余一讀嘆其厚於情也。因憶仙客遭幕府末路。効力外事。屢歷艱難。頃又著一書。敘述始末。慷慨悲憤。蓋亦小杜之遺意也。豈唯留連舊情。眷戀往歡而已哉。余爲推其意。跋於後如此。蓮舟云。僕惟有賦巧言之四章。以謝先生也已。

擬古

月姊年幾何。十三又加七。春秋猶富焉。兒女期繞膝。繞膝有兒女。一身孳育難。負抱要替手。回顧託阿漫。阿漫何處去。去沾油與菴。沾菴美芳香。沾油奈偃蹇。早晨天氣寒。冰凍油家門。滑倒阿漫足。手中油皆翻。油翻不可收。地上綠淋瀝。甲乙雙狗來。舐不餘一滴。菴葉雖在手。失油妾無辭。何以謝主婦。磔狗剝其皮。其皮何所用。

蒙鼓槌在掌。一擊琴琴響。二擊琴琴響。

窟前奏樂圖已亥一月

窟門扃。天地冥。窟門闢。天地白。排闥力男臂力强。工舞白女又上場。神道設教聖人說。莫嗤古史傳荒唐。禮樂征伐雙有之。神之喜之。喜可知。彼狹蠅輩胡爲者。敏鎌一揮風一吹。於戲乎鎌揮風吹。群妖匿。光明普照瑞穗國。長使吾輩戴一天。卜年不數兆與億。靈珠綴髻髻玲瓏。石窟扉前舞八風。再使日光輝四字。補天不讓女媧功。

清盛入道

庭上鬼頭小成巨。既中馬尾巢碩鼠。揮日意氣安在哉。身熱無奈如鼎煮。朝裏威福任自操。一門子弟極奢豪。回憶平太當年跡。短衣衝泥木屐高。括觀一身終與始。不外倚伏盛衰理。四絃琵琶調

入商。至今聲悲平家史。

題文信國遺像

罡風吹海海霧晦。檣旗傾倒艤幢碎。海上浮屍十萬餘。中有趙家肉一塊。側身南望孤臣悲。國亡不死非男兒。赴義柴市從容甚。天地正氣賴維持。一幅生綃長一丈。丹青描出忠臣像。留取丹心阿堵中。如生鬚眉見颯爽。吁嗟乎將軍頭。侍中血。睢陽齒。常山舌。上下千載相照映。一樣鬼神泣壯烈。安得西台如意竹一根。畫前一擊招天上之魂。

梅潭云。全首滿目悲涼。字挾風霜。起四句結數句措詞縱橫。善與題協。

北條泰時

亂離世得少時康。執命陪臣七世長。儉素風貽孫子穀。公明治賴

股肱良。欺民久學齊田氏。廢主非同漢霍光。罪惡滔天功在國。平心論獨有親房。

秋雨書懷

一間矮屋團瓢小。竹几繩牀位置好。秋風挾雨打窓來。落葉滿階濕不掃。鬚眉毵毵成何事。兀坐攤書空幽討。一穗燈火三更夜。除却古人知音少。我欲陳書叩北闕。才薄難草封禪稿。我欲從軍出玉關。筋力既疲奈何老。紛紛悔吝何時已。無生無始悟不了。蒼海茫茫去路賒。白鷗浩蕩閒雲渺。一切不如任拋却。且覓壺觴自傾倒。

讀征韓偉略

十萬耳朵一抔土。想見豐公赫而怒。暴師三軍無成功。毋寧後世嘲黷武。英雄手滑不知停。空殘海內外生靈。當年楊廣李世民。前

車有戒聲不聽。斯公智勇不世出。千慮之失或有一。何知心事有別在。外征欲圖邦內之靜謐。當時逐鹿猶有人。力屈不是心服真。若不擲與一塊肉。會將向我吠狺狺。控御有索握在手。驅將健兒拚命走。要之自保一策耳。偉功何比氣長足之后。昔人不悟今人仍。毀譽往往錯淄澠。魅人耳目到今日。其身何曾野狐憑。吁嘻乎其身何曾野狐憑。九原有知將笑斥鷃議大鵬。

夏日閒居

一椽倚叢竹。新筍出泥斜。久絕鹿蕉夢。同鄰農圃家。地閒詩易就。市遠酒難賒。貧可驕人處。架頭書五車。

觀蒙古來寇幟畫

昔誦新樂府。愛誦蒙古來。今日來觀之。頓覺心胸開。揮刀直前不怯死。十萬虜兵何蟲蟻。倒檣登艦敵辟易。男子國中真男子。布置

得方畫逼真。宛似足蹈而目覩。當時龍口斬世忠。歷歷勝算在胸中。唯有相摸太郎指揮定。一斷能奏不世功。獨怪博多鑄銅像。不鑄烏帽緩帶之英雄。疊石塔上立何物。緇衣纏身頭是童。

舊劍

子孫雖庶矣。族系在清門。猶記先登勇。難忘舊主恩。殺多腥血淬。歲久歎銘昏。未敢脫腰售。欲存烈士魂。

碓井觀楓

秋與春爭妍。葉比花更好。霜林絢丹霞。爛漫照晴昊。縮地駕尻輪。聊學長房狡。百里不宿春。盡日恣幽訪。斯地昔設險。鳥路紛相糾。仁政利行旅。險非如蜀道。車箱相排連。輾轉鐵齒較。人智贊天工。設計賦奇巧。詩人無俗懷。愛此金風峭。藉草圖一醉。未妨玉山倒。歸來夜未央。仰見明月皓。肩頭擔一枝。紅色分外嬌。

諸葛春耕圖

六合紛爭日。隆中出大儒。兩朝開補弼。百戰任征誅。高誼崔徐侶。奇才管樂俱。千秋誇遇合。三顧許馳驅。將相全材備。君臣一德孚。黃初聞有號。赤伏恨無符。辛苦三分業。伶仃六尺孤。七擒真智勇。六出太崎嶇。心在報先帝。功期還舊都。雙肩荷負重。兩表肺肝敷。偽定能多日。偏安豈一隅。果驚司馬走。不愧臥龍呼。初願全生已。高懷曠代無。荷犁春及雨。披帙古為徒。鸚鵡隨時樂。止流以地殊。誰探古人秘。一幅畫成圖。

木村芥舟云。浣花而後。後人無復措詞。不意當代有此傑作。閒澹敘去。妙句累出。使人擊節不已。學海云。排稟沈鬱。典麗浩澹。似朱竹垞禹陵忠武忠肅等諸作。今日辨此等筆墨者。不知有幾人。排律難抑揚起伏。此篇有變化。有開闔。氣魄筆力。十分

透徹。決不恥古人。

落花用袁子才韻

繁華一夢莫追論。眼底風光易斷魂。燕啄紅銜梁上壘。馬蹄香踏雨餘村。原無碧縷維長命。空向朱幡謝舊恩。好與人生同比例。盛衰榮悴不殊門。

次敬香見寄詩韻。戲述近況。為答。

遮莫翻雲覆雨譁。隨身竿木儘生涯。年來雞肋久投箸。春後蝶情多負花。作賦工夫空祭獮。學仙氣味只餐霞。一椽賃得他人廡。寄傲還誇是我家。近賃隣人一小樓為讀書之處。

蓮榭夜涼

篠簞湖在城北隅。六月菡萏開滿湖。恍疑東海老麻姑。擲來粒粒作明珠。天上明月映眉鬚。水上清風透肌膚。數句褰幪緇塵污。來

此頓覺百骸蘇。何者大聲仰天呼。臣本高陽舊酒徒。太白仙人安在乎。招來欲同共一壺。倚醉長嘯駭栖鳥。醉倒欲倩姮娥扶。此花此月真難孤。不關傍人笑胡盧。俯仰千載幾人無。天公應恕此狂夫。安得董巨調綠又研朱。縱筆寫出蓮樹夜涼圖。

森槐南云。興會所到。落筆灑然。快極狂呼。不覺旁葩恣肆。若其通體。自然隨手拈來。莫不中音。正所謂以無厚入有間者。青蓮之後。惟有眉山。豈意數百年此調傳之吾蓮翁。

展黃村先生墓

天道真難測。人事那易料。哲人繫其妻。帝閭不可叫。房南接訃音。心旌不禁搖。悲哉又悲哉。噩夢竟不覺。不能束芻奠。不能扶紼導。蒼黃為位哭。沼沚荐新芻。初在都門日。起居聞失調。榻下拜清容。躬睹顏色好。平生健康質。心期不日療。奈何撒雙手。去趁玉樓召。

憶昔在茗鬢。書窓共螢照。名節相砥礪。經史互量較。及壯上官途。先生名獨噪。直道果不容。三黜氣彌劭。最後得主眷。法京擁旄纛。時乎時不可。莫由夙志報。顧吾竟何如。才踈氣空傲。一廢不可記。徒矜青蠅弔。先生眼獨青。云猶有可教。涸轍魚得蘇。援手出泥淖。未得效尺寸。詎圖來毀誚。為憐許丞聾。繆傳成縉嘯。時有飛語云。先生過信僚屬事。多舛錯。僚屬謂余也。一檄來自東。致回漢槎權。吁我負先生。衷情無所告。滄桑遽然改。物外勵清操。手持一枝筆。詩壇恣騰蹕。一軒號景蘇。居然峨眉貌。字字色絲綴。句句寒玉敲。餘事尚勝人。舉世傾且倒。失彼而得此。何必漫嗟悼。青山空寂寞。烏兔忙走跳。轉眼經三載。墓門今日到。破箒把在手。聊欲宿草埽。一篇陳狂言。或博泉下笑。芥舟云。吾兄之於黃村。學共螢雪。仕同出處。關係綦深。神契意投。有他人不可得而窺者。紆餘曲折。低徊不能自措焉。一讀令

人油然感動。豈得不仰慕哉。

九秋咏

明媚蒼嵐與碧波。淡粧濃抹態如何。誰從玉樹金風裏。更唱瓊枝璧月歌。一雨芙蓉含淚瘦。半枯楊柳織愁多。不嫌秋圃花憔悴。日籬邊載酒過。秋容

平淡功從絢爛深。試參造化悟文心。一天風緊鴉翻墨。滿圃霜嚴菊散金。涼月有情窺破牖。夕陽無語靜疎林。白蘋紅蓼汀洲路。畫法老倪傳到今。秋色

碧梧庭院雨初收。銀漢微雲淡不流。千里澄江敷匹練。一輪明月浸高樓。天邊雁度黑排字。鏡裡人悲白滿頭。點綴窓階海棠老。風風雨雨奈何愁。秋影

律換清商心自驚。一番搖落劇關情。飄零千樹蟲沙劫。風雨三更

草木兵。永夜寒閨碾搗月。荒蘆斷渚雁支更。挑燈細讀歐陽賦。欲向旻天訴不平。秋聲

眼看狼藉褪妝紅。嘆息池塘一夜風。楚客消魂磁盞裏。吳剛斫斧月輪中。永宵机上心香補。新釀泥頭鼻觀通。最愛群芳零落後。菊花黃滿竹籬東。秋香

芋頭菱角雜登盤。桑落盈樽醉可拚。百歲宜安吾輩淡。一生難免秀才酸。蘆汀紫蟹初過斷。蓼渚銀鱸恰上竿。莫道貧家易糧匱。饑來仍可落英餐。秋味

射鵬盤馬漫誇豪。三尺腰間有寶刀。雨逼疎燈蛩語急。山橫絕塞雁飛高。一天雲霧霏涼露。東海潮來咽怒濤。九辨不須悲宋玉。何妨乘興好題糕。秋氣

回頭幾度費沈吟。自歎新霜兩鬢侵。熱酒難銷豪士恨。寒燈乍動

旅人心。哀蟬落葉秋無賴。臨水登山感不禁。吾亦平生最蕭瑟。江湖何處覓知音。秋意

有情無奈九回腸。對月臨風萬恨長。黃菊叢沾霜暈淡。青衫汗雜酒痕香。尊前惜別昏銀燭。牆角相思泣海棠。淒絕四絃江上聽。聲幽咽古潯陽。秋魂

芥舟先生持畫帖。命弟塗鴉。內有梅南靄山遺墨。俯仰今昔。感慨身世。凄然有此作。卽書乞正。

開卷不禁雙淚流。酒詩徵逐憶同遊。故人往往歸黃土。塵境茫茫易白頭。入世可憐牛馬走。及身空作稻粱謀。功名畢竟非吾分。海上追隨浩蕩鷗。

庚子新年自述

濫竽久矣盜時名。竿木隨身場幾更。壯不若人今既老。死無餘憾

也長生。三盃自壽屠蘇酒。雙耳閒聽睨曉鶯。慚愧聖恩如海大。新年叨得賜餐榮。

題大黑天像

踞坐米苞舉酒觴。豐頤巨口莞笑容。每家祭祀甲子夜。道與世人與福祥。雙股蘿菹盛盤堆。焚香膜拜樺燭光。濟衆博施仁者事。肯爲一人肥私囊。一擲碎成千萬段。英雄無復猴面郎。嗚吁英雄無復猴面郎。誰副此神俠肝腸。

哭河田貫堂先生

司教杏壇久。箕裘有世傳。奇才原厄命。大患欲尤天。曾共雪泥跡。難忘香火緣。北邙斜陽冷。一望一潸然。愧我託知己。詩盟又酒盟。百杯逢大戶。五字困長城。浮世果疑夢。斯文誰握衡。差強人意者。尙及斂先生。

春水

眼看遙岑宿雪融。江頭今日又春風。三篙潮漲穩浮鴨。一鏡光澄
涵臥虹。依約征帆花霧外。參差新燕柳煙中。更憐曲曲闌干下。照
見美人裙影紅。

咏史六首

洪浪堆中拚此身。果然鎮得海龍噴。盪平夷賊凱旋日。第一功名
屬美人。橘姬

這般慧業幾生修。眼見婉容輸一籌。不獨捲簾邀帝喜。枕中秘錄
足千秋。清姬

漫莫虞初一樣論。筆端鐵袞託微言。琵琶湖上秋宵月。長照才媛
未死魂。紫姬

胸裏聖知涇渭分。買來吉夢駕風雲。武娘呂姥無顏色。南面居然

尼將軍。政子

紅妝擷甲夙從戎。陷陣擐旗男子同。未免後人遺憾在。虞兮不遂
殉重瞳。巴

演來悲史入哀絲。一掃舊腔新出奇。作曲人間傳十二。筆花淨似
碧琉璃。阿通

同國青厓。松聽劍。訪和亭畫伯寓。席上作歌。

鴻鈞妙運左右手。弄得烏兔雙丸走。百年三萬六千日。算來不值
一炊久。人生聚散水上萍。忽漫相逢亦非偶。天涯海濊雲山隔。意
氣聯之共尊酒。主人為誰瀧和亭。畫名目今推山斗。宇宙森羅千
萬象。筆端收為自家有。側有年少新茂才。春風張緒王恭柳。青厓
詩追唐賢風。騷壇王盧爭前後。聽劍高談座無敵。不數鄒衍談天
口。紋楸三枰耦默坐。搗虛出奇互勝負。蓮舟不肯壁上觀。故欲衆

前呈其醜。論齒主人少一歲。傲然坐在衆賓右。吁嗟乎雪泥偶印鴻爪痕。後來誰復記某某。我有侈願試相問。不知主人能許否。展來一幅剡藤紙。一斗墨瀋快運肘。遂使老成典型少年丰采共一圖。茲予其間傳不朽。

芥舟云。押韻穩巧。全幅飛動。所謂得之於手而應於心。豈啻僚之丸扁之輪。

移居青山。從子朔郎爲營一室。爲讀書之所。賦之

志喜。

琴書十載幾回移。如洗貧無地立錐。逃俗寧甘龜曳尾。入時未解黛描眉。任憑世上笑鳩拙。賴有汝曹憐叔癡。新構茅軒穩容膝。不教伯道嘆無兒。

螺盃歌 盃在錄倉所購

酒星醉墜海底眠。不覺滄海變桑田。雷椎電斧巧驅使。劉成酒器形如拳。旋紋細理繚而曲。和氣盎盎温若玉。恍有奇光似前生。可憐猶帶海水綠。購得此盃狂不啻。非陶非冶天然器。知伯頭骨嫌血腥。宗閔荷葉饒蔬氣。爭如此盃天巧藉人巧。月夕花朝便遨戲。張鍊師奔月卮。蘇東坡玉卷荷。物以人重物乃傳。果然金石與同堅。持螯擘柑坐盤礴。與汝同結糟邱緣。我持此盃游東海。東海仙人欣相待。我持此盃赴瑤池。瑤池王母迎堦墀。游仙夢境真寥廓。膏騰醉語天花落。覺來幻影仍在眼。復持此盃獨自酌。芥舟云。古有瑤瑤枕。枕之而寐。則十洲三島盡夢中。螺盃豈亦其類乎。

依江子琴韻言懷

老去生花筆退尖。讀書猶下舊時簾。三間草屋燈光暈。一夜銀河

雁影添。婦爲久貧衣未剪。身因漸健食能兼。却思隔海從征士。滿目風塵不解嚴。

昨詠秋柳依王阮亭韻。用其元微韻。今又續賦用

陽先韻。

白痕遙認板橋霜。光景荒涼十里塘。三疊驪歌經入拍。千金舞袖儘藏箱。樓頭小雨愁兒女。巷口斜陽話謝王。悟徹榮枯眼前事。不須更訪菩提坊。

風蕭雨颯鎮堪憐。空伴寒鴉與暮烟。遮莫歲華同逝水。平生心性易纏綿。花驄陌上曾三月。玉笛聲中又一年。仍憶珠簾高捲起。柔條輕拂硯池邊。

柳北翁追福會席上

俠骨豪懷冠一時。江湖人駭此才奇。身經離亂化蟲臂。天遣文章

留豹皮。鷗渡空餘浮白地。柳橋仍唱鬧紅詞。風流未歇典型在。定有英靈泉下知。

歲暮書懷

回頭往事散如煙。赴壑修蛇難可牽。爭奈雕蟲成小技。疇將磨蠍問前緣。極天歷徧三千界。隨地經來七十年。鎮日高吟又高臥。閒愁不到酒盃邊。

轆線自知無寸長。可憐鮑老太郎當。半宵淚盡懷人夢。三世緣空選佛場。鼎折如聞虞餓覆。齒寒不免說唇亡。長安棋局未終劫。眼見門前車馬忙。

輓福澤翁

育材爲性命。終世不彈冠。能吐布衣氣。夙開文化端。龍蛇驚歲厄。桃李泣春寒。聞說九重上。悼嗟減御餐。

蓮舟遺稿
憶自締交始。幾年快飲醇。學窮今古變。文見性情真。冀北誰千里。斗南第一人。梁頽空若夢。老淚欲沾巾。

芥舟云。慶弔之詩。往往入于陳腐。或勃窣。吾兄此作巧而不浮。華實並備。餘人決不能及。真斷熬煉石之才也。

讀雲海詩鈔

天上有詩仙。珊珊玉骨秀。垂手挹雲海。一一貯雙袖。飛下人間界。撒布普宇宙。氣辭千萬年。胸羅廿八宿。三寸不律操。日與吉人鬪。偏師擣長城。長城不能守。有時綺而艷。環肥兼燕瘦。有時豪而放。雨急雷電驟。宛轉珠走盤。容與雲出岫。世上悠悠士。眼光小似豆。詎知吟詩外。功在中外懋。尊俎曾專對。非寇是婚媾。議律定國基。三章數敷奏。食肉何必鄙。斯人出華胄。老夫辱下交。不自揣謏陋。傾倒吐卮言。何關阿好詬。曾讀雨中集。金玉不堪收。續出有此鈔。

譬如錦加繡。學問與齡進。古人言不謬。更望待數年。再祛奚囊富。以駭世人目。從今幾回又。

芥舟云。押韻穩秀。曲折自如。有月流有聲。花淡如影之妙。

題莊子夢蝶圖

睡醒無二致。莊蝶本同身。世上悠悠者。漫分夢與真。

新夏雜咏五首錄二

野老有深情。饋我艾糕旨。眼中無一丁。交道却不市。長安多故人。欲問今何似。

屋後鑿有池。水碧環叢篠。不由風吹過。波紋搖裊裊。見得荷葉外。魚苗針樣小。

鎌倉

香火千年無歇時。羣飛鳥革立崇祠。豪奢鶴帶黃金冊。威烈人稱

白色旗。刀血淋漓銀杏樹。舞容慘澹苧環詞。史家說盡興亡跡。總入小奚囊裏詩。

陽明遺硯歌

陽明山人天下傑。能文能武千載烈。伯仲之間見伊呂。下視管樂齊跛鼈。有歎有銘了莫疑。人間愁有一硯遺。墨瀋如濕光熊熊。騎箕精神嘆鬚眉。憶昔間關龍場驛。危坐日日繙義易。瘞旒文成泣鬼神。硯兮與汝同慘感。南昌一夜豔妖雲。投袂而起誓三軍。倚馬草來討逆檄。硯兮與汝分偉勳。竭來悠悠三百歲。精光不知何處瘞。冬心之印細篆絲。獨有高士偏心契。匣有刻印曰冬心之印予獲斯硯喜欲狂。百金不吝傾宦囊。摩挲劇乎十五女。淨几明窓永寶藏。祗愧碌碌無一技。頭顱如此長已矣。災石之嘲莫由解。爾不負我我負爾。芥舟云。斯寶歸先生之有。何等因緣。詩亦秀潤。濯濯與硯相稱。

對雪獨坐用聚星堂詩韻

寒雨蕭蕭響竹葉。中宵飛霰尋爲雪。造化小兒巧弄戲。鏤花六出駭奇絕。晨炊烟微檐牙重。朝市人急屐齒折。雲影千層斷還連。曦光一片明乍滅。既敵緼袍不禦寒。襟袪幾回煩手掣。峭風入牕利於刀。吹得老膚欲生纈。纈有青州從事在。乳腐湯羹黃齋屑。獨斟獨殮搔白頭。百年蟾烏眼一瞥。彩筆既經夢中還。白戰故事那可說。拈毫強欲賦一詩。硯池冰凍堅於鐵。

白桃花

嫣然含笑鎖無言。閑伴梨雲閉小園。白髮難消息。嬌恨紅塵不到武陵源。傳盃酒泛珠千斛。頰面眉添月一痕。洗淨鉛華甘寂寞。誤他崔護覓柴門。

餞春

東風吹暖鶯聲老。滿地落花無人掃。九十春光轉瞬改。青帝之駕促上道。經旬苦雨不放晴。小庭縱橫溢行潦。閉門閒愁不可排。倚遍闌干空懊惱。懊惱不止惜春歸。回頭事事與心違。虎頭骨相鏡中老。鴻爪蹤跡雪裏非。騰霄伏櫪各有命。空望畫餅計充饑。春兮餞汝酒一杯。何日再得笑口開。仍俟三百六十日。路花明處堤柳青邊更迎汝來。

行路難

吾生有豪興。幻想作泛宅。一載美人。一載騷客。結緣笙歌叢。把臂文章伯。烟波佳處皆遊迹。老死江湖亦不惜。行路難。願不償。踟躕而行荆棘場。避債無臺。苦海無航。腰若弧。頭戴霜。人間那有長樂鄉。

送人罷官而歸

解組匆忙理旅裝。再教諸葛臥南陽。君恩或冀酬他日。國事何堪付彼蒼。憂世心腸傷太熱。居官項骨說能強。吾期安石出山速。栗里莫關松菊荒。

賽卯行

龜井戶村菅廟東。繞池逶迤一徑通。松杉交翠開洞府。穹隆華表鑄青銅。妙義山神神如在。道爲人間護火害。每年新正初卯日。墜下千人萬人拜。莫說賽卯何緣由。且供都人一日游。傘影衣香紛載途。分明紙符插在頭。

白小魚

夜江春漲新。篝火照船唇。入罟色同水。和羹味厭尊。明君移遠種。深惠普都人。長與海苔伍。于今誇八珍。

走馬燈

額上三眼如炬明。巨口如盤血色頰。披髮小童行躑躅。一盆豆腐
手中擎。抱兒而立女骨立。無是產難死者精。禹鼎所鑄溫犀燃。現
出百怪夜中行。忽見富士山麓狩。一號令下萬馬驟。百里平原草
如茵。鳴鏑響處狐兔走。中有老猪猛如虎。捉尾而騎刀擬脰。仁田
四郎勇無雙。論功當時在人右。爛漫櫻花開滿枝。照夜燈燭光陸
離。高屐來者誰氏子。輕移蓮步故遲遲。胡然而天胡然帝。螻首蛾
眉白玉肌。若非西蜀楊家女。定是東越浣紗施。轉眼剎那極變化。
兒童歡觀笑滿座。太西近有寫影活動之方。傳來世上人驚訝。噫
嘻走馬燈。與之不相下。何須貴彼而卑此。自謙動欲避三舍。

腐草爲螢

大火西流後。既非前度身。平蕪遺質朽。冷砌得生新。今見兜紈扇。
前經輾錦輪。謝池驚昨夢。隋苑閃餘燐。萍絮同因果。形神有幻真。

依依飛入幙。熠熠去過鄰。成隊隨風颺。分明怕月嗔。更憐替藜火。
偏照讀書人。

秋夜曲

帝少皞。日庚辛。梧葉殞。海棠墜。楚客曾咏悲哉氣。何況吾曹本恨
人。夜漫漫兮更漏永。讀書漸覺燈火親。燈火雖親志不伸。臣朔空
誦十萬言。策治安。論過秦。洛陽才子人中麟。謠詠偏遇絳灌輩。帝
王還空問鬼神。一麾出傳長沙王。行弔屈原湘江濱。古往今來渾
如是。不須依佛證果因。嗟我有手不能掇青紫。嗟我有眼不能識
金銀。鬚髮既毳毼。肝膽空輪囷。噫嘻乎秋氣悲。秋夜永何以遣之。
祗伊丹新釀醇乎醇。

蟹

可憎面目突雙睛。鸚嘴虎文徒竊名。無有寸腸猶戟手。背人隨處

肆橫行。

商山采芝圖

商山事與首陽同。誑世漫粧高士風。果被留侯傀儡使。采殘芝草混蒿蓬。惜不采芝終此生。出山何事一無成。安劉功竟遜周勃。空負當時羽翼名。先生畢竟豈時材。也被留侯牽率來。羽翼歌成不歸去。靈芝應老白雲隈。祇是商顏可樂饑。漢廷多事助光儀。故應輸却桃源客。直到晉年人始知。

秋蟬

閱盡人間炎與涼。蕭條身世黯心傷。半年餐飽露華白。一片抱牢

風葉黃。昔夢難醒同瘦蝶。新交更締有寒螿。可憐肅殺金飈底。舊調于今猶未忘。

驟寒

棲鴉驚磔磔。勁風鳴枯柯。銀漏箭漸下。永夜三更過。讀書猶未寐。悄坐剪燭花。乍驚硯生冰。麝墨不可磨。撥開爐中灰。獸炭幾塊加。不知出征士。今宵寒若何。

蘇武牧羊圖

節旄半落敝綿裘。雪裡牧羊天盡頭。回首漢廷何事在。人奴有姊既封侯。

小西湖冬晴

昔社雅集分韻得微

千年香火賽仙妃。一島如浮水四圍。昨雨初晴天氣淨。小春纔過午風微。池頭荷蓋無餘翠。霜後楓人未脫緋。拚得湖心亭上醉。熬

油鍋底海鮮肥。

供兔羹

將門子弟。僧門衣飾。跋胡壺尾。天荆地棘。東道有主。可藏身。纔避仇家類物色。山中無物祝新正。被簑冒雪肩銃行。獵得一兔兒。調供一杯羹。於戲乎一杯羹千古名。

春燕

殷勤仍舊款柴扉。倩影翩翩帶夕暉。曲岸柳烟時一剪。空梁泥壘又雙歸。不因途遠錯前約。豈為主貧殊所依。憐汝能辭王謝宅。青衿猶著去年衣。

鍾馗賣劍圖

丹青今日誰稱最。山人畫筆如椽大。慘澹經營出新意。一幅生絹弄狡獪。終南進士勇無前。久操鬼群生殺權。底事樞具三尺劍。脫

腰容易乍當錢。利器一失難再得。徒招渠輩喜動色。萬一有再犯帝坐。何以護之吾太惑。大腹彭亨漁陽胡。玉環仙子媚如狐。况有十郎當竈場。顛倒忠奸紫奪朱。眼前不為斬姦用。空慙十年費磨礪。纔戮么麼小魑魅。母乃大錯輕與重。老馗見機眼光明。買犢買牛計歸耕。知難而退為謀善。亂離之世全此生。拈筆上頭題狂言。欲請觀者子細評。

寄木村熊二在小諸

人世渾如爪雪鴻。回頭往事半成空。記不四十年前夜。燈下呷唔一榻同。

秋郊觀禾

三伏不知暑。每夜月離畢。衣怯羅衫單。途見潦水溢。去歲有遠征。丁壯皆外出。無人任耕耨。婦孺纔在室。却得大有年。近來稱無匹。

蓮舟遺稿
今不能如昨。羲和謬其秩。勸農縱盡力。救荒恐無術。詎圖秋入後。破雲見天日。祝融逞餘燄。可卜秋成必。我皇卹民隱。深仁與天一。盛德果感神。否往逢泰吉。野老手加額。頓覺百憂失。欲和擊壤篇。夜窓弄秃筆。

老少年

駐得紅顏豈是仙。雁來時節色偏妍。屈強不奉東皇勅。恬退何爭祖逖鞭。枉被世間推老輩。纔隨人後送殘年。山茶未放菊花瘦。秋暮風光儘獨專。

禁門雪

去歲洗兵雨。凝成六出花。城中明不夜。望裡淨無瑕。高闕夢埋碧。複橋柱着葩。秋收知可卜。加額拜君嘉。

金光射眼寶星鮮。莫是將軍奏凱旋。一騎青驄馬蹄白。禁門蹴雪

去朝天。

自題詩草

取付丙丁如可慳。還慚類句不堪刪。纔教一片存心血。敢道長留天地間。

海樓觀月

金龜嶼上金龜樓。高峙斷岸峭巖頭。東南面海海蒼茫。蓬萊三島望裡收。况逢秋夕無雲翳。中天一輪月華麗。倚欄盤礴徐引白。自喜獨私天妃惠。冷然身御禦冠風。倚爾魂繞廣寒宮。如是快事世無有。三千世界眼中空。此脚不蹈王侯府。慣受挪揄世人侮。只幸與月有前緣。異鄉作客相賓主。無乃姮娥識我生耽詩。非要一篇使吐胸中奇。奈何老去才退筆。無花空自拈斷頰下幾根髭。

雨夜新寒飲酒

夜雨催寒酒力輕。纔吹爐火一星明。不虞仍有煨殘栗。灰底轟然爆有聲。

冬日感懷

人情深似武溪深。知己誰如磁引鍼。百草還無耐寒色。孤松獨保插天心。幾年官拙嘆薪積。千里家遙悲鯉沈。好在膽瓶梅一朵。閒窓鎖日伴長吟。

盆梅

羅浮山外別成春。千載師雄夢旣陳。撮土尺盆開世界。冰肌玉骨好丰神。盤根石襯欹斜態。老幹苔封重疊皴。喚做吾妻豈無謂。帳中榻側鎮隨身。

庭梅未放

春立已過旬。臘雪消不了。朔風襲敝袍。堅冰錮池沼。去年手植梅。

芳信今尙杳。老幹空槎枒。蓓蕾如黍小。催旣借羯鼓。使亦勞青鳥。奈何彼姝子。手揮頭仍掉。不見啓齒粲。一笑來嫋嫋。家貧珠難量。或怪聘儀少。才短筆無華。或憎惡詩黷。徒背勸月手。忍寒立清曉。春石云。使筆如舌。何等自在。擲揄之妙。令世外佳人不得不粲然一笑。

漫成

不向孔方稱弟。直呼造化以兒。月旦偏多皮相。漫云斯老善詩。後圃有鳩呼婦。前檐見燕引兒。屋裡所藏何物。韓蘇文李杜詩。

移竹

居豈可無竹。幸有故人遺。得遂平生願。驚喜不可支。昨雨土脉旺。何須待醉時。手携鴉觜錘。數竿移植之。不羨柯亭驛。不羨渭川涯。枝嫩雨堪織。葉疎月可篩。對此青眼友。欣然舉酒卮。箕踞清風裡。

三伏暑不知。

秋海棠

淡抹臙脂學內家。春容八月也繁華。曉應怯露寒于水。天亦悲秋瘦到花。蟋蟀欄前簾影暗。鞦韆架上月光斜。可憐生在金風候。不使放翁狂更加。

觀潮行

吾聞子胥賜屬鏤。盛以鴟夷投江流。千載冤魂消不盡。化爲潮濤與越仇。掀天撼地勢澎湃。翻弄山嶽若小毬。一任三千強弩射。螳臂當年晒錢鏐。生在隔海一游未。年來孤負桑蓬志。崔嵬吳山第

一峰。不得立馬一決背。偉哉天地斯巨觀。夜臥三更勞夢寐。纔誦陳篇古人句。臥游徃徃強自慰。沈寥天氣海風涼。杖鞋偶經大洗鄉。東岸乃是米利幹。遙遙萬里太平洋。中空捲來晴天雪。風馬雲車影渺茫。萬千氣象須臾變。前後左右應接忙。休把東西漫量較。儘足夙志得相償。噫嘻乎夙志得相償。愧無佳句充奚背囊。

讀平家物語

躬爲相國女爲后。西八條門簇馬車。莫咎平生驕汰甚。葫蘆有樣在藤家。和頑以孝有虞同。倚重當年獨此公。何有還忘家國任。熊祠祈死恐齊東。醋甕子亡能視力。傘工兒不克家才。鼠巢馬尾非良識。殲盡全家海水涯。

無奈朱旗色不鮮。如螽敵箭及龍船。千尋水底空移蹕。蹈海甘爲趙昞先。

前司當日有遺編。鉅筆能追太史遷。廿載榮枯繪如畫。哀音好譜四絃傳。

門司壇浦費趨趨。孤負當時荅敕書。不去契丹翻赤幟。還從海底奉皇輿。

落葉

樵逕霜乾響馬蹄。疎林斜日影淒淒。非花也被封姨妬。有恨曾經怨女題。自分年華逢代嬪。何堪蹤跡辱塗泥。零丁一樣憐同劫。黃菊殘花老萎啼。

謝米溪詞兄邀遊其後園

人間清福莫多求。若許林泉足縱游。掩日松高苔逕曲。濯纓水淨

玉河流。及時櫻筍美堪飽。滿架鼎彝奇可搜。老去偏欣談往事。此間肯許再來不。

挽雲海子爵

奇才詎計出侯家。乃是昆吾劍莫耶。聽樂傳名吳季札。流涕憂國賈長沙。蘭言夙締三生石。椽筆爭看五色花。慟哭西州門外路。何時得再對尖叉。

讀追蘇唱和集

彼此心情彼此知。唱酬妙句攄相思。力全九鼎獨扛處。興到雙肩高聳時。金擲居然殊瓦響。龍騰會應有雲隨。望塵哂我瞠乎後。幾度空吟十疊詩。

題默鳳十年草書圖

默鳳默無言。無言應有說。吾想三寸毛穎子。卽是先生廣長舌。橫

豎側正隨意揮。無非一一嘔心血。剪韭倒薤結體奇。不屑簪花兼
鏤雪。磨來墨瀋足一斗。瀉來八尺吳綾裂。世路崎嶇貧如洗。乞米
有例在前哲。祇不負十年堆屋柿葉乾。草書久矣穿硯鐵。

偶成

竿木一枝隨處隨。馬齡早已近期願。雪泥憶偶印鴻爪。羊質慚曾
蒙虎皮。飢餓文辭何有益。崎嶇世路數迷歧。來年重遇戊申曆。未
忘春風得意時。予登科在嘉永戊申

買書

昨償酒逋餘。囊底偶有錢。購來幾部書。插架獨自憐。笑比松與竹。
足同飾新年。憶昔識之無。在七十年前。爾來多歲月。羨魚空臨淵。
不知文字跡。畢竟是蹄筌。曹倉鄴架雖多矣。不及孝先腹便便。還
羨白蟬三食神仙字。登時換骨即上天。

漫興

一自懸車後。避人多掩門。清時誰竊譽。閒處猶稱尊。風力穿窓緊。
雲容釀雪昏。禦寒唯有酒。賢聖不須論。

春陰

壁門濕透弛琴絃。雨後慳看日色鮮。雙屐慵尋行樂地。一年已近
落花天。窓前翠竹長收影。牆外青山薄罩煙。寂寞門無人問字。踟
躕一榻學參禪。

自題寫真

瘦骨稜稜白髮新。居然面目得吾真。客來一笑先相問。似否靈臺
畫像人。

一見何須更問名。描來老狀儼如生。吾家自有麒麟閣。不費萬斤
銅鑄成。

次韻花月會

青山環堵地。敢道避紛華。纔賃三椽屋。還栽數畝花。處心能自在。取樂欲無涯。更待幾旬後。湘南浮釣槎。

驟雨

赤雲烘日榴火燒。深林鳥叫婆餅焦。倏有橫風吹暴雨。跳珠點點打芭蕉。潑墨米家開畫本。投梭龍女織冰綃。葛衫無須葵扇拚。覺得炎威一時消。須臾雲散天宇清。樹杪彩虹影似橋。

逗子雜詠

何人剪淞綠。一幅快斧刀。潮退沙痕淨。雲開島影遙。木欄山外路。酒旆柳邊橋。避暑都人到。載途驛鐸聒。茅茨沿小港。三兩互相仍。井淺少甘水。山頽多廢墜。濃煙燒海藻。密線結魚罾。知有好魚兆。角聲隨處興。

八九吞雲夢。乾坤任簸揚。雙丸隨跳盪。一氣湧蒼茫。日暮海風怒。秋來潮氣涼。釣竿長在手。獨踞巨巖傍。巢覆無完卵。到今哀史傳。命名稱六代。抱恨百千年。生死依僧俠。謳歌憶祖賢。斜陽亂山路。雲外一聲鷗。

菊花菹

豹舌熊蹯染指難。菊菹野味儘堆盤。長生何冀南陽壽。饒口還追楚客餐。最好三盃圖軟飽。不妨一點帶微酸。秋風時節尊鱸外。足補先生新食單。

心太平硯歌并序

沼稱白鵝。嶼號金龜。蓋湘南山川馳名之妙境。爲輦下裙屐避暑之勝區。三庚之炎威不及。趙孟之日不須簾遮。滿地之露滴常滋。元規之塵何要扇障。僕之來此。呼吸海氣之沆瀣。

拍浮潮流而優游。曲浦長汀。手不放一竿。沙邱貝逕。脚常躡
雙屐。病祛體健。興多心安。無奈舊雨不來。門絕無登音。靈胥
時怒。耳惟聽鼉吼。未免望遠抱離群之感。登樓有非土之懷。
方斯時。有郵筒傳好音。知故人得奇寶。喜可知也。樂若之何。
於戲。物聚所好之手。物之數也。天惠有心之人。天之情也。况
閱來刼運。而一卷之未泐。與鼎鐘斧古。遠傳雅談。爲千古之
所希。足珪璧同珍也乎。不禁雀躍之樂。何顧蛙鳴之嘲。漫賦
一篇。遠寄百里。因知追諸賢之踪。徒爲雞肋。敢冀在百歲之
後。永留豹皮。

端州石硯平無池。老學菴裡之所遺。磨洗認得心太平。三字款識
了無疑。緬想滄桑變幻後。來七百年委塵垢。文光何曾甘埋沒。中
宵奕奕衝牛斗。若待後世嗜古人。拾得收爲几上珍。顯晦自然有

定數。每與文士結奇緣。始有老山後鳴鶴。披麻肇窠入神各。潑墨
舐毫資其助。硯兮應喜得所託。今歸詩人櫻山家。促開筆頭五彩
花。調高城中唱白雪。情艷樓上按紅牙。天於神物吝惜至。不肯妄
附非其器。鯁生何敢漫羨妬。單有侈望君莫異。吾人石田久無秋。
私心欲暫借荊州。展來蔡侯磨陳元。一試塗鴉君許不。

老將

萬里輪臺白骨橫。將軍百戰此餘生。天高銅柱飛鳶度。風黑南山
射虎行。一臥滄江新歲月。十年遼海舊勳名。腰間曾佩雙龍在。陰
雨時聽匣裡聲。
何甘衰朽遽歸耕。寰宇如今久洗兵。麟閣策勳諸將在。蠶叢脫險
一身輕。匣中刀劍風雲氣。夢裡關山鼓角聲。聞道韓山誅小醜。短
衣還欲請長纓。

歲杪放歌

君不見五石尊。魏王瓠。三年葉。宋人楮。濩落無所容。彫剗亦何補。何如市井投此身。手握牙籌學賈人。白璧交王侯。黃金買笑顰。何如萬里躡芒履。一筇汗漫游山水。或逢白玉蟾。儻見赤松子。碧翁與我有何仇。慳而不畀何所由。三十六旬劍一吹。赴壑修蛇挽不留。只得擁爐坐。只得掩關臥。不知古往今來文章事業爲何物。不關輪烏環兔晝夜不息如旋磨。

題源白石像

調羹補袞經綸手。泣鬼驚人錦繡腸。事業文章如是足。何須更作閻羅王。

芝城山館雅集次主人原唱韻

躑躅滿山紅欲然。交柯新樹綠相連。薰風方及清和節。雅會復溫

文字緣。恰有嘉賓來隔海。偏欣老子廁開筵。私心願倩襄陽筆。永與西園千載傳。

詠石

一臥野人籬落邊。雨淋苔蝕幾千年。點頭曾聽生公偈。流血何堪秦政鞭。世有相皮愧汝醜。誰知樹骨保其堅。猶懷古佐媧皇業。不朽功勳在補天。

填海何時期志成。俱焚今日奈斯生。空思立在燕然頂。長勒將軍戰勝名。

長命寺雅集追題

回首曾遊墮淚頻。諸公書畫跡猶新。平生慣得落人後。今日還爲未死人。

哭箕輪止山翁

一日曾叨長。相於昔社中。小詩探險韻。雄辯吐長虹。香火緣非淺。琴尊跡既空。暇晴亭閣上。今後有誰同。

秋草

短亭行盡又長亭。憶起當時幾度經。春日暄曾試盤馬。秋心灰尙化爲螢。憐他旣戴霜痕白。同我潛消鬢上青。更有敝袍牽舊感。從來顏色共凋零。

矢口懷古

一字畫旗旗色新。誓將討賊繼前人。誰知危禍藏船底。空遣遺蹤問水濱。雲裡顯靈讐得復。廟中塑像眼猶瞋。全家殉國同楠氏。傳得義名千萬春。

擁爐讀書

燈火吐焰細。峭寒欲透帷。擁爐披陳編。直到雞號時。古人千載前。

事事悉吾師。私心之所淑。畢竟欲資誰。平觀世上人。多行肉走尸。夜郎徒自大。夏蟲漫多疑。回顧時一省。自愧此鬚眉。昂藏七尺身。安可無一奇。

枯荷

行吟閒步水雲鄉。不見凌波舊日妝。萍藻無情隨梗泛。鴛鴦有夢怯宵涼。魂消池館三更雨。秋老銀塘一夜霜。惆悵菱歌何處聽。數聲漁笛咽斜陽。

庚戌元旦試筆

柳顰梅笑物皆春。轉眼還遭歲序新。偏駭年年年入手。今朝算到八旬人。

墨江送春

絆春不得送春去。旖旎風光歸何處。臨歧惜別空低回。落花如雪

柳飛絮。絮飛花落奈何情。十里長堤少人行。三匝之祠梅兒塚。綠陰如幕杜鵑鳴。我欲千金買一刻。築成金屋駐顏色。底事辭去不回首。遺愁空嗟酒無力。醉花無客寂畫樓。江上不見載妓舟。中郎遺跡千載杳。風流誰復問白鷗。已焉哉。鶯簧暗兮蝶拍止。羲駕促兮隙駒駛。勸君及時須行樂。莫遣華年付逝水。

牡丹

群芳歇後見精神。認得花王自有真。名遍洛陽傾國色。詩傳亭北倚欄人。酒酣豐頰紅增膩。浴罷柔肌淨絕塵。富貴風流雙美併。平章三十六宮春。

八十誕辰自述

天保二辛卯九月十六日生下谷

幾回北馬與南船。鴻爪痕留海外天。笠島荆榛曾墜關。燕京尊俎儘周旋。算齡八十誇身健。存稿三千懶自編。更笑毫餘閒事業。夫

妻時學橘中仙。

書感

拜賜菊盃金色新。感深恩典及微臣。位班雞殿叨陪末。家住青山遠隔塵。名姓曾編游俠傳。頭銜今署老詩人。眼中閱盡滄桑改。八十猶存未死身。

秋夜

今夕是何夕。銀河若許清。匆匆過半歲。落落老斯生。蘭簿多新鬼。鷗波負舊盟。一杯長在手。不用世間名。

桃太郎征鬼島圖

生於桃核桃為字。天成勇武有誰比。力能扛鼎膽如斗。少小即有遠征志。遠征所志有那邊。渺茫雲濤程幾千。島喚鬼島鬼所宅。敢梗王化久有年。梗化何容緩其罰。一朝慨然請授鉞。搏黍成糕足

糧餉期將一掃空。魔窟幕中三士意氣投。攘臂瞋目誓同仇。狗也善警雉善鬪。猴也多智饒詭謀。擒其王兮收其貨。容易不費手一唾。高唱凱歌奏其捷。論功不在班超亞。君不見明治御宇我武揚。往往輩出桃太郎。屠堅城兮摧堅艦。陸有乃木海東鄉。母乃慈母懷裡話。深印乳兒之心腸。休道此事荒唐甚。胎教蒙養同一方。鼓舞神州男子氣。此圖應匹矢蓬與弧桑。

欲雪

四山如冒絮。渾被白雲封。水澗暗溪確。林深杳寺鐘。寒爐茶不熟。凍硯墨難濃。晚竈炊烟冷。低籠屋後松。

御題寒月照梅花

鄒律吹春信。小庭早見梅。枝頭寒月挂。窗外暗香來。皎潔真同雪。玲瓏不染埃。圖開和靖宅。賦待廣平才。粉蝶相知未。美人入夢纔。

杏桃皆賸耳。風骨亦仙哉。隴使傳消息。化工巧剪裁。嫦娥長作伴。占得百花魁。

辛亥歲首試筆

眼前生意總津津。柳已舒眉梅破唇。八十今年又加一。七迎二首六身春。

觀刈稻

一年三百日。辛苦十之九。期待逢斯秋。乃得餬八口。遺秉與滯穗。亦足利寡婦。收鎌還其家。笑傾一杯酒。醉後鼾聲高。帝力亦何有。勝島仙坡星陵雅集。雨阻不得趨陪。次其見似詩

韻道謝

憾不參陪樽酒前。久違青眼既經年。乘槎滄海千層浪。決背齊州九點煙。關地強兵普皇烈。著書樂道魯騷賢。知君憑弔幾行淚。灑

作奚囊金玉篇。

春燕

呢喃絮語盼繁華。妙舞翩翩倩影斜。酒閣酒帘春千里。垂楊垂柳路三叉。舊年泥壘空蛛網。昨雨園林又杏花。憐汝無緣栖大廈。重尋仍是野人家。

月下醉歸

風輪旋轉隙駒驅。眼見炎涼換須臾。按曆還逢古中秋。此宵此月不可孤。挂我杖頭錢。訪我舊酒壚。當壚有女顏如玉。侑我丹釀之醍醐。引手沒指呷濡鼻。滿胸磊塊掃來虛。玻璃一燈開明鏡。清光咫尺接眉鬚。愴心神喪所主。無端欲牽姮娥裾。起舞耶當學鮑老。高歌楚些雜吳歎。醉歸影在地上長。盤珊步不須人扶。何關路頭傍觀者。一齊拍手笑胡盧。

春石云。對中秋之明月。醉丹釀之美酒。酣嬉跌宕。正爾盡致。何等胸襟。何等筆力。

寄內

奉帚殷勤五十秋。量鹽數米儘分憂。偶偷餘暇操彤管。能守長貧到白頭。入世眉無憑我畫。游山酒每向卿謀。肯堂肯構孫兒在。俱喜從今百不愁。

次青萍兄見贈詩韻以答

伏雌不復冀飛雄。纔把文字小弄工。都都平丈仍錯誤。敢望學博與詞鴻。中興偉業莫與京。愧無涓滴答聖明。身行萬里年八十。回首前塵似隔生。

喜萍游兄見訪

午枕夢初破。微聞剝啄聲。故人歡邂逅。握手話平生。舌本波瀾湧。

胸中磊砢橫。尋常榮與悴。何必太關情。

壬子試筆

送迎烏與兔。九九猶加一。椒酒覺微醺。腸中芒角出。擘來溪藤箋。呼童具硯筆。平生不臨池。敢望顏柳匹。數行墨豬字。聊且誇兒姪。

美人風箏

平步青雲不自知。暗中牽引有紅絲。已成仙骨三生幸。未了春情一點癡。夢雨原非真色相。迴風仍見舊腰支。無腔絃管憑天籟。顧曲周郎莫漫嗤。

誰開色界彩雲邊。來與春風結幻緣。鴻影翩飛驚絕代。蛾眉澹掃去朝天。耳聞秘曲依稀響。手有情絲縹緲牽。畢竟佳人多薄命。徒同飄絮過年年。

偷得當年墨翟工。纔憑一線御長風。蓬萊兜率追隨遠。城郭人民

指顧空。珠佩光輝王母殿。羽衣曲妙廣寒宮。不須更羨寒鴉色。常帶昭陽日影紅。

金蓮眞箇步虛行。雲外飄飄彩袂輕。欲共仙人控鶴去。祇期天使駕龍迎。月中妙舞霓裳曲。鸞背新腔弄玉笙。二十五郎吹管籥。終應不及自然聲。

仙樂洋洋下界聞。玉妃舞袖儘披紛。不傳妙曲廣陵散。如見艷姿巫峽雲。高步天衢朝北極。同吹笙譜有東君。一絲單賴春風力。無翻還追鸞鶴群。

盆池

盆池不盈尺。猶足養金魚。莫道小天地。優游樂有餘。

衣笠山

若使斯翁今未死。壽一百六可屈指。論功誰復爭第一。塑像高班

幕下士。野老所傳是耶非。颯爽威貌儼鬚眉。想見散遣孫子去。躍馬揮刀酣戰時。小祠今存山之背。閱盡滄桑替幾代。獨有忠義感人深。時祭仍見玄酒醑。欲歸遙聞吼蒲牢。萬壑風清寂松濤。回頭四顧不見人。寒月當天一輪高。

偶感

息影來依秋樹根。悠悠水繞一荒村。空潭本是無波浪。時爲蘋風漾碧痕。

秋感

大正四乙卯先生年八十有五

幾根白髮不堪搔。磨盡當年意氣豪。同輩多躋千佛頂。浮生真愧九牛毛。仙餘靈藥人爭攫。竈有焦桐手自操。大火西流過秋半。中天空望酒星高。

11
2
475

終

